

Ulutala o Lesona Taitasi

1. O le Valaauina o Aperaaamo
2. O le Faatuatua o Aperaaamo
3. O le Atalii na Folafolaina
4. O Atalii e To'a Lua o Aperaaamo.
5. O le Fanau Moni a Aperaaamo
6. O le Feagaiga e Faavavau
7. O le Alofa Tunoa e Faavavau
8. O se Faatuatua e Galue
9. O le Faaola o Aperaaamo
10. O le Onosai o Aperaaamo
11. Aioi mo Tagata Agasala
12. O le Tofi o Aperaaamo

O Lesona Faale-Tusi Paia o le Sapati, o se suesuega faapolokalame lea o aso taitasi, o loo faavae atoa lava i le Tusi Paia ma le Agaga o Valoaga e aunoa ma ni manatu faaopoopo. O siitaga ua matua pupuu lava ina ia maua ai manatu manino ma le tuusa'o. O puipui [] o loo faaaoga i nisi o taimi ina ia mautinoa ai le manino, ma le malamalamaaga manino o le aotelega o manatu o loo talanoaina, ma faigofie ai ona faitau. O loo matua fautuaina lava le suesueina atili o tusi o lo o aumaia ai a tatou suesuega.

O Lesona Faale-Tusi Paia o le Sapati (USPS 005-118), Vol. 93, No. 1, Ianuari-Mati, 2017. Saunia i kuata taitasi e le Matagaluega o le A'oga o le Sapati a le Koneferenisi Aoao a le Faagaioiga Toe Fuatai Aso Fitu o le Toe Afio Mai. Aiā o Meatotino © 2017, lomia ma tufatufaina e le Reformation Herald Publishing Association, 5240 Hollins Road, Roanoke, Virginia 24019-5048, U.S.A.

- **AUSETALIA**

Telefoni - 61-2-9627-7553

Fax 61-2-9627-7554

Website: www.sdarm.org.au

E-mail: info@sdarm.org.au

- **SAMOA**

P.O.BOX 6458

APIA

SAMOA

Lesona: www.sdarm.org

O le Valaauina o Aperaaamo

“O le a Ou faia oe ma malo tele, o le a Ou faamanuia foi ia te oe, o le a Ou matua faamamaluina lou igoa; o le a avea foi oe o se manuiaga” (Kenese 12:2).

“O Aperaaamo na tupu a’e i le lotolotoi o a’oa’oga o talitonuga i agaga o ē ua oti ma le faapaupau. . . . Peitai o le faatuatua moni e le’i soloiesea. Na faatumauina e le Atua i taimi uma lava ni tagata totoe e auauna ia te Ia.” - *Patriarchs and Prophets*, p. 125.

Faitauga Fautuaina: *Patriarchs and Prophets*, pp. 125-131.

Ulua’i Aso

Ianuari 1

1. UA VALAAUINA E LE ATUA APERAAMO

a. O le a le mea na valaauina Aperaaamo e le Atua na te faia, ma o ai na la o? Kenese 12:1-4; Galuega 7:4.

“Ina ua mavae le faasalalauina mai i Papelu, o le ifo i tupua na toeitiiti lava a toe so’o atoa ai le lalolagi, ma na tuua ai loa e le Alii tagata solitulafono fa’ama’a’aina ina ia latou mulimuli i o latou ala leaga, a’o Ia filifilia loa Aperaaamo, o lē na tupuga mai ia Semu, ma Ia faia o ia o sē e tausia Lana tulafono mo augatupulaga oi lumanai.” - *Patriarchs and Prophets*, p. 125.

b. Aisea na le’i ta’uina ai e le Atua i le taimi lava lena ia Aperaaamo le nofoaga lea na Ia valaauina o ia e alu i ai? Eperu 11:8. O le a le filifiliga sa tatau ona faia e Aperaaamo i lona usitai i le valaau a le Atua? Kenese 12:1; Mataio 10:34-38.

“O le usitai e aunoa ma le tuufesili o Aperaaamo, o le tasi lea o faamaoniga sili ona iloga o le faatuatua ua faapea ona maua i totonu o le Tusi Paia uma. . . . E le’o se tofotofoga māmā lea na aumaia i luga o Aperaaamo, e lē o se taulaga ofo itiiti lea na manaomia mai ia te ia. Sa i ai filifili malolosi lava na fusia atu ai o ia i lona atunuuu, i ona tagata, ma lona aiga. Peitai e le’i faatuai ona ia usitai i le valaau. E le’i i ai sana fesili na fesiligia e faatatau i le laueleele o le folafolaga. . . . Ua fetalai le Atua, ma o Lana auauna e tataua ona usitai; o le nofoaga sili ona fiafia ai mo ia, o le nofoaga lea e finagalo le Atua e nofo ai o ia.” - Ibid., p. 126.

Aso Gafua

Ianuari 2

2. O FOLAFOLAGA

a. O a ulua’i folafolaga na faia e le Atua ia Aperaaamo? Kenese 12:2, 3.

“O le sini o le aumaia o meaalofo silisili lava a le Lagi i tagata uma o le laueleele lea na valaauina ai e le Atua Aperaaamo ina ia alu ese mai i ona aiga ifo i tupua, ma Ia faatonu atu ai ia te ia ina ‘ia ia nofo i le elelee o Kanana. Na Ia fetalai mai, ‘O le a Ou faia ma malo tele ē e tutupu mai ia te oe, o le a Ou faamanuia foi ia te oe, ma faamamaluina lou igoa; o le a avea foi oe o se faamanuiaga’ (Kenese 12:2). O se mamalu maua lava na valaauina i ai Aperaaamo - o le avea lea ma tamā o tagata na filifilia e puipuia ma tausimaluina le upu moni a le Atua i seneturi e tele i le lalolagi, o tagata ia o le a ala mai ai le faamanuiaina o malo uma o le lalolagi i le afio mai o le Mesia na folafolaina mai.

“Na matua leiloa lava mai i tagata le iloa e faatatau i le Atua moni. O ō latou mafaufau na faapogisaina e le ifo i tupua. Na taumafai tagata e suia poloaiga faalelagi ia e ‘paia, tonu, ma lelei’ (Roma 7:12), i tulafono na loto gatasi ma fuafulaga a o latou lava loto sauā, faapito. Ae peitai o le Atua i lona alofa, na te le’i soloiesea ai i latou. Na Ia finagalo ina ia avatu ia i latou le avanoa latou te iloa ai o Ia e ala atu i Lana ekalesia. Na Ia fuafua ina ia avea tapulaa na fa’aalia e ala atu i Ona tagata ina ia avea ma auala o le toe fa’afoisiaina mai o le faatusa o le amio a le Atua i totonu o le tagata.” - *Prophets and Kings*, pp. 15, 16.

b. O le fea laueleele na folafola e le Atua ia Aperaaamo ma lana fanau? Kenese 12:5-7; 13:14-18.

c. O le a le tāua o le nofo o Aperamo ma ana fanau i fale ie? Eperu 11:9, 10, 13-16. O le a le uiga faapea lea ua valaauina i tatou ina ia tatou faia? 2 Peteru 3:11-14.

“Tatou taumafai ina ia avea i tatou ma kerisiano (faapei o Keriso) i uiga uma lava o le upu, ma ia faapena foi ona lauga atu o tatou ofu, talanoaga, ma a tatou gaioiga ia iloa ai ua fausia Keriso i totonu, o le faamoemoe lea o le manuia, ma o loo tatou vaavaai atu mo lena faamoemoe e manuia ai ma le fa’aali matagofie mai o Iesu. Tatou faailoa atu ia i latou o loo i o tatou itu uma faapea, o le lalolagi lenei e lē o lo tatou aiga lea, ma o i tatou o tagata faimalaga ma tagata ese iinei.” - *The Review and Herald*, June 10, 1852.

Aso Lua

Ianuari 3

3. O LE MEA SESE TELE A LOTA

a. O le a le faaososoga na pa’u atu i ai Lota a’o ia faimalaga faatasi atu ma Aperamo agai i le laueleele folafolaina? Kenese 13:5-11; 1 Ioane 2:16, 17.

“O le vaegā eleele sili ona ola lelei ai faatoaga i Palesitina atoa lava o le Vanu lea o Ioritana, sa faamanatu atu ai i ē na vaavaai atu i ai, e faatatau i le Parataiso ua leiloa ma faapena ona latou faatusatusaina ai i le matagofie ma le ola lelei ai o mea totō o laufanua fa’atamaoaigaina o le Naila lea na latou faato’a o ese mai ai. . . . O le faafoina o Lota i manatunatuga o mea faalelalolagi e maua mai, o lea na ia lē amanaiaina ai amioga leaga ma tulaga leaga faaleagaga o le a fetaiaia [i totonu o fale tetele tumutumu o aai tamaoaiga ma matagofie]. O tagata sa nonofo i nofoaga mafolafola o i latou o ni ‘tagata matua agasala lava i luma o le Alii,’ peitai, o lenei tulaga na te le’i iloa, poo le isi tulaga, na ia iloa lava, ae na ia manatu māmā i ai. Na ‘ia filifilia mo ia le laueleele mafolafola atoa lava o Ioritana,’ ma na ia ‘faatuina lona faleie agai i Sotoma’ (Kenese 13:11, 12). Na matua itiiti lava lona iloa atu i le lumanai i iuga matautia o lena filifiliga loto faapito!” - *Patriarchs and Prophets*, p. 133.

b. O le a le mea o loo saili le tiapolo na te maua e ala atu i le tuinanau o mata? Mareko 4:18, 19; Mataio 4:8-10.

“Afai e faatagaina manaoga ma popolega o le lalolagi ina ia faatumulia ai o tatou taimi uma lava ma o tatou mafaufau, o ō tatou malosi faaleagaga la ua faavaivaia ma mate auā e lē o faaaogaina.” - *This Day With God*, p. 87.

c. E faapefea ona mafai ona faaumatia e le nofoaga ua tatou filifili e faatu ai o tatou faleie, lo tatou olaga faaleagaga ma olaga faaleagaga o ō tatou aiga? Kenese 13:12, 13; 19:1, 12-16.

“O le toatele . . . i le filifilia o se nofoaga e nonofo ai . . . e sili atu lo latou vaavaai i manuia faalētumau e ono mafai ona latou maua nai lo aafiaga faaleagaga o le amio ma fesootaiga o le a siomia ai i latou ma o latou aiga. Latou te filifilia se atunuu matagofie ma le eleele lelei, poo lo latou siitia atu foi i se aai tamaoaiga, i le faamoemoe mo le faamausaliina mai mo i latou o manuia sili atu; peitai o a latou fanau o loo siomia e faaosoosoga, ma o le tele lava o taimi, latou te fausia ai fesootaiga e lē lelei i le fausiaina a’e o le amio lelei ma le fausiaina o se amio sa’o. O le siomaga o amioga lē pulea, o le lē talitonu, o le uiga lē ano i mea faalēagaga, e i ai lona aafiaga e faalēaogaina ai le aafiaga o matua. . . . E toatele latou te fausia faigauo mo tagata lē manana’o i le Atua ma tagata lē talitonu, ma latou lafo atu loa la latou vili faatasi ma fili o le Atua.” - *Patriarchs and Prophets*, pp. 168, 169.

Aso Lulu

Ianuari 4

4. SIOMAGA TUMU I LE AGASALA

a. O le a se mea e tatau ona tatou suesueina mai i le mea na tupu i le avā a Lota? Kenese 19:26; Luka 17:28-33.

“[O le avā a Lota] na ia tetee i le Atua auā o Ana faasalaga na aofia ai ana meatotino ma ana fanau i le faafanoga. . . .

“O valaaulia o le alofa tunoa o loo fetalai maia i tagata uma; ma, talu ai la ona o a tatou uo latou te teena le alofa aoi o le Faaola, po’o le a tatou liliu ese ai ea foi? O le faaolataga o le agaga e matua taua lava. O Keriso ua uma ona Ia totogiina se tau lē mafuatia mo lo tatou faaolataga, ma e leai se tasi na te faatāuaina le tau o

lenei taulaga tele poo le tau o le agaga o le a ia inosia le alofa tunoa o le Atua ua ofoina mai, ona ua filifili isi latou te teena.” - *Patriarchs and Prophets*, pp. 161, 162.

b. E ui lava ina sao mai fanau teine a Lota mai i Sotoma, na faapefea ona faaleagaina a la amio? Kenese 19:30-38; Levitiko 18:6, 7.

“Na sola atu Lota agai i mauga ma ia nofo ai i totonu o se ana, ua aveesea mai ia te ia mea uma lava na mafua ai ona ia lē fefe e tuuina atu lona aiga i aafiaga o se aai amio leaga. Peitai o le malaia o Sotoma na mulimuli mai lava ia te ia iinei. O amioga leaga a ona afafine, o le iuga lea o fesootaiga leaga o lena nofoaga leaga tele. O amioga faaleagaina o lena nofoaga na matua tuufaatasia lava ma a la amio, o lea e le’i mafai ai ona la iloa le eseesea i le va o le lelei ma le leaga. Na pau lava tagata na tupuga mai ia Lota, o tagata Moapi ia ma tagata Amoni, o ni ituaiga amio leaga ia ma le ifo i tupua, o tagata tetee i le Atua.” - *Ibid.*, pp. 167, 168.

c. I nei aso mulimuli, o fea le nofoaga sili ona saogalemu e tatau ona faatuina ai o tatou faleie a’o tatou faimalaga agai atu i le laueleele folafolaina, ma aisea? Kenese 2:7, 8; Iuta 5-8.

“O le umi lava e foai mai ai e le Atua ia te a’u le malosi ou te tautala atu ai i o tatou tagata, o le a fa’aauau ai lava ona ou valaau atu i matua ina ia latou o ese mai i aai ma ia latou nonofo i le vao, le nofoaga lea e mafai ai ona latou galuea’iina le palapala ma latou a’oa’oina ai mai i le tusi o le natura, lesona o le amio mamā ma le olaga faigofie. O mea o le natura o auauna lē leoa ia a le Alii, ua foai mai ia i tatou ina ia a’oa’o ai i tatou i upu moni faaleagaga. Latou te tautala mai ia i tatou e faatatau i le alofa o le Atua ma faailoa mai ai le poto o Lē silisiliese na Ia faia ia mea uma.” - *The Adventist Home*, pp. 146, 147.

Aso Tofi

Ianuari 5

5. FAAMAUTINOAINA O LO TATOU VALAAULIA

a. E pei ona valaauina i tatou i le Eleele Folafofaina e pei ona valaauina Aperamo, o le a se mea e tatau ona tatou mataala i ai? 2 Peteru 1:10, 11; Mataio 22:14.

“E leai se tasi e manaomia ina ia na lē maua le ola e faavavau. O I latou uma lava e filifili i aso taitasi ina ia latou a’oa’o e faatatau i leFaia’oga faalelagi, o le a ia faamautinoaina lona valaaulia ma lona filifilia. Ia tatou faamaulalo o tatou loto i luma o le Atua ma ia tatou mulimuli pea i luma ina ia tatou iloa o Ia o Lē, afai e sa’o lo tatou iloa e faatatau ia te Ia, o le ola e faavavau lea. . . .

“E lē o ia i tatou se malosi tatou te faatagaina ai soo se mea lava e vavaeeseina i tatou mai i le Atua ma le lagi. O le olaga lenei e tatau ai ona tatou tofusia i le natura faalelagi. Tuaganē ma uso, e tasi lava le ola o loo ia te outou tou te ola ai. Ia avea. Oka, ia avea lea ma olaga amioatua, o se olaga e natia faatasi ma le Atua i totonu i le Atua!” – *In Heavenly Places*, p. 29.

b. O ai i latou, ma e na o i latou lava, o le a o’o atu i le Eleele Folafofaina? Faaaliga 17:14; Eperu 3:12-14.

“O le galuega o le faatoilaloina o le leaga e tatau ona faia e ala i le faatuatua. O i latou e o atu i totonu o le laufanua o le taua o le a latou iloa, e tatau ona latou ofuina le talita atoatoa lava a le Atua. O le talita a le Atua o le a avea ma o latou puipuiga ma o le a mafai ai e i latou ona sili atu nai lo tagata manumalo. E leai lava se isi mea o le a aoga a ua na o lenei lava – o le faatuatua lea ia Ieova o ‘au, ma le usitai i Ana faatonuga. O au tau tetele lava e fa’aa’upegaina i isi malosiaga, taleni ma tomāi uma lava, o le a leai se mea e mafai ona faia ai i le tauiviga mulimuli lava. A aunoa ma le faatuatua, o se au o agelu e lē mafai ona latou fesoasoani. Ua na o le faatuatua ola lava o le a lē faatoilaloina ai i latou ma mafai ai e i latou ona tulai i le aso leaga, mausali, lē mafaagae’etia, ma taofi mausali i le amataga o lo latou faatuatuaga seia o’o i le iuga.” – *Counsels to Parents, Teachers, and Students*, pp. 182, 183.

Aso Faraile

Ianuari 6

FESILI TOE FAAMANATU

1. O le a le uiga o le sili atu o lo tatou alofa i o tatou aiga nai lo lo tatou alofa ia Keriso?
2. E faapefea ona tatou iloa poo i tatou o ni tagata faimalaga, e lē o nonofo tumau i lenei lalolagi, ma o ni tagata ese i le lalolagi, i le taimi lenei?
3. Faamatala pe faapefea ona aafia lo tatou iuga i la tatou filifiliga o le nofoaga tatou te nonofo ai.
4. O le a le lamatiaga o le nonofo i nofoaga e latalata i aai e tumu i le agasala?
5. Aisea e lē filifilia ai i latou uma e valaauina?

Lesona 2

Sapati, Ianuari 14, 2017

O le Faatuatua o Aperamo

"O [Aperamo] na ia talitonu ia IEOVA; ma na Ia ta'ua lea o le amiotonu ia te ia" (Kenese 15:6).

“O o tatou loto e mafai ona koleniina ina ia talitonu, ma a’oa’o ina ia faalagolago i le Upu a le Atua.” – *Our High Calling*, p. 119.

Faitauga Fautuaina: *Testimonies*, vol. 6, pp. 91-99.

Ulua'i Aso

Ianuari 8

1. **O LE POPOLEGA SILISILI LAVA O APERAAMO**
 - a. **O le a le popolega tele lava o Aperamo e faatatau i folafolaga a le Atua? Kenese 12:7; 15:1-3.**

“A’o le’i i ai se atalii o Aperamo, na ia ulua’i manatu faapea o lana auauna faatuatuaaina o Elisara, e tatau ona avea ma ona atalii e ala i lona fa’atamafaiina o ia, ma avea ai o ia ma ona suli. Peitai na faailoa mai e le Atua ia Aperamo faapea, o lana auauna e lē tatau ona avea ma ona atalii ma

ona suli, peitai o le a ia maua moni lava se atalii.” – *The Story of Redemption*, p. 77.

b. Na faapefea ona faamautinoa mai e le Atua ia Aperamo faapea Na te lē'i faagaloina Lana folafolaga? Kenese 15:4, 5; Isaia 55:10, 11.

“E finagalo le Atua ia i tatou ina ia tatou maua faamanuiaga tetele lava. O ana folafolaga ua matua manino lava le fetalaiina mai, o lea, e leai ai se mafuaaga o le masalosalo. Na te finagalo ia i tatou ina ia tatou talitonu ia te Ia i le upu tonu lava Na te fetalai mai. I nisi o taimi, o le a matua tele ai lava lo tatou fememea'i ma tatou lē iloa ai le mea tonu lava e tatau ona fai. Peitai i taimi faapena, o lo tatou avanoa sili ona taua lo tatou fetagofi atu i a tatou Tusi Paia ma faitau feau ua Ia tuuina mai ia i tatou; ona tatou tootuli ifo lea ma ole atu ia te Ia ina ia fesoasoani mai ia i tatou. O le tele o taimi ua Ia aumai ai ia i tatou faamaoniga e iloa ai o Ia o se Atua e faafofoga mai ma tali mai i a tatou tatalo. Na te faataunuuina Ana folafolaga i le tulaga matua sili atu ona taumasuasua nai lo le tulaga tatou te manatu tatou te maua ai le fesoasoani. . . .

“Soo se mea lava tatou te i ai, ua tatou i ai i lalo o le matafaioi i le avea o i tatou ma so'o o lo tatou Alii ma lo tatou Matai, ina ia taula lo tatou faatuatua i folafolaga a le Atua.” – *The Watchman*, May 1, 1914.

Aso Gafua

Ianuari 9

2. TALITONU ATOATO

a. Aisea na filifili ai Aperamo e talitonu i le folafolaga a le Atua Na te foi mai se tamaitiiti? Kenese 15:6 (vaega muamua); Roma 4:20, 21.

“O lena faatuatua, lea e galue i le alofa ma faamamāina ai le agaga, e lē o se mataupu lea o lagona oso vale. O le faatuatua lea, e lē fefe e mulimuli i folafolaga a le Atua, ma talitonu mausali lava faapea o le upu ua Ia fetalai mai, Na te mafaia foi ona faataunuuina.” – *Our High Calling*, p. 119.

“[Filipi 4:4-7]. O le folafolaga lava ia, e leai sona aoga seivagana ua ou talitonu atoatoa lava faapea, o Lē ua faia mai le folafolaga, Na te matua mafaia lava

ona faataunuuina, ma e lē mafuatia Lona mana Na te faia ai mea uma lava ua Ia fetalai mai.” – *This Day With God*, p. 156.

b. O le a le tau i o Aperaa mo lona talitonu i le folafolaga a le Atua? Kenese 15:6 (vaega mulimuli); Roma 4:22.

“O le taimi lava e talitonu ai le tagata agasala ia Keriso, e tulai ai i luma o le silafaga a le Atua ua lē ta’usalaina; auā o le amiotonu a Keriso ua avea mo ia: O le usitai atoatoa o Keriso, ua tuuina atu mo ia. Peitai e tataua ona ia galue faatasi ma le mana faalelagi, ma tuuina atu lana taumafaiga faaletagata e faatoilalo ai le agasala, ma ia tulai atoatoa ai i totonu ia Keriso.” – *Fundamentals of Christian Education*, pp. 429, 430.

“E mafai ona tatou malolo i le Atua, e lē ona o la tatou lava amiotonu, peitai, ona o le amiotonu a Keriso, ua foai mai ia i tatou. E tataua ona tatou vaai ese mai ia i tatou lava agai atu i le Tama’i Mamoe a le Atua, o Lē e lē’i faia se agasala; ma o lo tatou vaavaai ia te Ia i le faatuatua, o le a tatou faapei ai o Ia.” – *Gospel Workers* (1892), p. 427.

c. O afea e faatinoina moni ai lava le faatuatua? Eperu 11:1; Sapakuka 2:3.

“O le tumau i le faatuatua, o le tuueseina lea o lagona ma faanaunauga faapito, o le savali lea ma le loto maulalo faatasi ma le Alii, o le avea lea mo i tatou o Ana folafolaga, ma faaaogaina Ana folafolaga i taimi uma o o tatou olaga, ma tatou talitonu ai o le a galuea’iina e le Atua Ana lava fuafuaga ma Ana sini i totonu o lou loto ma lou olaga e ala i le faapaiaina o lau amio; o le faalagolago atoatoa atu lava lea, o le talitonu atoatoa lea, i le faamaoni o le Atua. Afai e mulimuli i lenei tulaga, o le a vaai isi i fua faapitoa o le Agaga ua faaalua i le olaga ma le amio.” – *Fundamentals of Christian Education*, pp. 341, 342.

Aso Lua

Ianuari 10

3. E TA’UAMIOTONUINA E LE ATUA TAGATA LĒ AMIOATUA

a. O le a se mea e faailoa mai ai ia i tatou o Aperaa o se tagata agasala lea na ia manaomia le ta’uamiotonuina? Roma 3:9-12, 23; Kenese 12:11-20.

“I le nofo ai o Aperamo i Aikupito, na ia faailoa atu le faamaoniga faapea, e lē’i saoloto o ia mai i le vaivai faaletagata ma amioga lē atoatoa. I lona natia o le mea moni faapea o Sara o lana avā lea, na ia faalataina ai le tausiga faalelagi i lona lē talitonu, o le leai lea o lona faatuatua ma le loto tele maualuga lea na matua faatele ona faailoaina mai i lona olaga.” – *Patriarchs and Prophets*, p. 130.

b. O le a le faamatalaga a le Tusi Paia e faatatau i le ta’uamiotonuina o Aperamo i luma o le Atua? Roma 4:1-8; 3:28.

“E na o le Alo pele lava o le Atua e ala atu ai le mautinoa o le taliaina o i tatou ia te Atua, ma o galuega lelei, ua na o se iuga lea o le galuega a Lona alofa faamagalosala. E lē o ni viiga ia iā i tatou, ma e leai foi se mea e foaiina mai ia i tatou mo a tatou galuega lelei e mafai ai ona tatou mauaina se vaega i le faaolataga o ō tatou agaga. O le faaolataga o le meaalofo ofo fua mai lea a le Atua i le tagata talitonu, e na o Keriso lava e ala mai ai lona foa’iina mai. O le loto atuatuvaale e mafai ona ia maua le filemu e ala i le faatuatua i totonu ia Keriso, ma o lona filemu o le a tutusa ma lona faatuatua ma lona talitonu. E lē mafai ona ia faailoa atu ana galuega lelei e avea o se olega mo le faaolataga o lona agaga.” – *The SDA Bible Commentary* [E. G. White Comments], vol. 5, p. 1122.

“Manatua na afio mai Keriso i le lalolagi ina ia lavea’i tagata agasala. E leai se mea o ia i tatou e ta’uamiotonuina atu ai i tatou i le Atua; o le olega e mafai ona tatou aioiina atu i le taimi lenei ma taimi uma e o’o i le faavavau, o lo tatou tulaga lea o le matua leai lava o so tatou fesoasoani, lea e faia ai Lona mana faaola o se mea tatou te matua manaomia. O le lafoaia o le faalagolago ifo o le tagata ia te ia lava, e mafai ai ona tatou vaavaai atu i le satauro o Kalevario.” – *The Ministry of Healing*, p. 65.

c. O le a le mea e tupu i se tagata lē amioatua pe a ia filifili e talitonu atoatoa lava lona loto i le Atua? Roma 6:17, 18; 10:9, 10; 1:17.

“O le taimi lava tatou te gaua’iina atu ai i tatou lava i le Atua, ma tatou talitonu ia Iesu, ua tatou maua loa le amiotonu a Keriso. Ua tatou iloa ua faatauina i

tatou mai i le agasala ma ua tatou fa'atāuaina Lona malia ina ia faatauina ai lo tatou saolotoga.” – *Manuscript Releases*, vol. 5, p. 34.

Aso Lulu

Ianuari 11

4. O SE FAAILOGA O LE LIUAGA

a. O le a le gaioiga i fafo na faia e Aperamo e faailoa mai ai lona suiga i totonu? Kenese 17:10, 11; Roma 4:11.

“O le sauniga o le peritome . . . na faatonuina ina ia faatinoina e le pateriaka o [Aperamo] ma i latou na tupuga mai ia te ia e fai ma faailoga e iloa ai na tuu atu atoatoa i latou i le auaunaga i le Atua ma faapena ona vavaeeseina ai i latou mai i tagata ifo i tupua, ma faapena ona talia ai i latou e le Atua e avea ma ana oa faapitoa. O lenei sauniga, na ta'utinoina atu ai i latou ua latou faataunuuna, i la latou vaega, aiaiga o le feagaiga na faia ma Aperamo. E le'i faatagaina i latou e ulufale i faaipoipoga ma tagata faapaupau; auā o lo latou faia faapena o le a leiloa ese atu ai mai ia i latou lo latou ava migao mo le Atua ma Lana tulafono paia; o le a faaosoosoina i latou ina ia latou faatasi i gaioiga agasala a isi malo ma o le a faatosinaina atu i latou i le ifo i tupua.” – *Patriarchs and Prophets*, p. 138.

b. Aisea e aoga ai le malamalama i le tulaga lenei, na ta'uamiotonuina Aperamo a'o le'i peritomeina o ia? Roma 4:8-12; 2:28, 29.

“O le amiotonu o le usitai lea i le tulafono. O le tulafono na te manaomia maia le amiotonu, ma o le mea lenei o loo nofo aitalafu ai le tagata agasala i le tulafono; peitai na te lē mafai ona ia tuuina atu le amiotonu. E tasi lava le auala e mafai ai ona ia ausia atu le amiotonu, e ala atu lea i le faatuatua. E ala atu i le faatuatua, e mafai ai ona ia aumaia i le Atua le amiotonu a Keriso, ma tu'u loa e le Atua le usitai a Lona Alo i le tulaga o le tagata. O le amiotonu a Keriso ua taliaina i le tulaga toilalo o le tagata, ma talia ai loa e le Atua, ma faamagalo, ma ta'uamiotonu, le tagata salamo talitonu, ma talia o ia e peiseai e amiotonu o ia, ma alofa ia te ia e faapei ona Ia alofa i lona Alo. . . .

“E toatele ua leiloa mai ia i latou le ala sa'o, ona o lo latou manatunatu faapea e tatau ona latou fe'a'ei a'e i le lagi, faapea e tatau ona latou faia se mea ina ia latou maua mai ai le fiafia mai o le Atua. Latou te saili ina ia sili atu ona lelei i latou e ala

i a latou lava taumafaiga e aunoa ma le fesoasoani a le Atua. O lenei tulaga e lē mafai lava ona latou faataunuuina. Ua uma ona saunia e Keriso le ala e ala i lona maliu mo i tatou, e ala i Lona soifua i le olaga o le faataitaiga mo i tatou, e ala i le avea o Ia ma a tatou Faitaulaga Sili. Ua Ia faailoa mai, ‘O A’u o le ala, ma le upu moni, ma le ola’ (Ioane 14:6). Afai na mafai ona tatou agai i luga o le apefa’i i se laasaga e tasi i soo sa tatou lava taumafaiga, o lona uiga e lē moni la upu a Keriso. Peitai a tatou taliaina Keriso, o galuega lelei, o le a vaaia e avea ma faamaoniga taumasuasua e iloa ai, ua tatou i ai i le ala o le ola, ma o Keriso o lo tatou ala lea, ma o loo tatou savavali i le ala moni e tau atu i le lagi.” – *Faith and Works*, pp. 101, 102.

Aso Tofi

Ianuari 12

5. PERITOMEINA I TOTONU

a. A’o le’i papatisoina i tatou i le vai (le gaioiga o le Feagaiga Fou lea e suitulaga i le peritome), o le a le mea e tatau ona tupu muamua i totonu? Ioane 3:5-8; Kolose 2:10-13.

“O i latou uma lava e ulufale atu i le ola fou e tatau ona latou malamalama, a’o latou le’i papatiso, e manaomia e le Alii lo latou alofa atoatoa lē ma-vaeluaina. . . . O le fua mai o fua e molimau i le amio a le laau. O le laau lelei e lē mafai ona fua mai i fua leaga. . . . O loo manaomia se liuaga mae’ae’a i le upu moni.” – *Evangelism*, p. 308.

“O tagata uma lava e faatasi atu ia Keriso, o le a avea o ia ma misionare ola ia i latou uma lava o loo i ona itu uma.” – *Ibid.*, p. 319.

b. O le a le mea e tupu i Kerisiano e faalagolago atoa lava i le gaioiga vaaia i fafo o le papatisoga ina ia lavea’iina ai i latou, e pei ona faalagolago tagata Iutaia i le peritome? Roma 10:1-3; Mataio 23:25-28.

“O lau sootaga ma le ekalesia, o manatu o le au uso e faatatau ia te oe, o le a lē aoga seivagana ua ē talitonu ia Keriso. E lē lava le na o lou talitonu *e faatatau* ia te Ia; e tatau ona ē talitonu *i totonu* ia te Ia. E tatau ona ē faalagolago atoatoa lava i lona alofa tunoa lavea’i.” – *Testimonies*, vol. 5, p. 49.

“E i ai le galuega a le Alii mo i tatou uma ia faia. Ma afai e lē o maua’a le upu moni i totonu o le loto, afai e lē o liua e le Agaga Paia uiga faalenatura o le amio, e lē mafai ona avea i tatou ma tagata faigaluega faatasi ma Iesu Keriso. O le uiga faalenatura o le tagata lava ia o le a vaaia lava i taimi uma lava, ma o le amio a Keriso o le a lē faaalua i o tatou olaga.” – *The SDA Bible Commentary* [E. G. White Comments], vol. 7, p. 969.

Aso Faraile

Ianuari 13

FESILI TOE FAAMANATU

1. **E faapefea ona mafai ona tatou maua le mautinoaga i folafolaga a le Atua?**
2. **O le a le uiga o le faatauanauiina i le upu a le Atua?**
3. **O le a le faamanuiaga alofa e mo i tatou pe a tatou gaua’i i le Atua?**
4. **O le a le faatusa o le peritome?**
5. **O le a le mea e sili atu lona taua, o le papatisoga i totonu poo fafo?**

Lesona 3

Sapati, Ianuari 21, 2017

O le Atalii na Folafolaina

“Na fetalaia mai folafolaga ia Aperamo ma so lana fanau. Na te lē’i faapea mai, I le fanau, e peiseai e toatele, ae to’atasi, O so lau fanau, o Keriso lava lea” (Kalatia 3:16).

“O le mea alofa ia Aperamo ma lana fanau, e lē na o le laueleele o Kanana na aofia ai, ae na aofia ai le lalolagi atoa lava.” – *Patriarchs and Prophets*, p. 170.

Faitauga Fautuaina: *Patriarchs and Prophets*, pp. 145-155.

Ulua’i Aso

Ianuari 15

1. O LE ATALII O LE FOLAFOLAGA

a. E ui lava ina sa ole atu Aperaaamo i le Atua mo se atalii e to'atasi e avea ma ona sulii, e fia fanau na folafola mai e le Atua na te faamanuiaina ai o ia? Kenese 13:15, 16; 15:2-5.

b. E faapefea ona faaalia e le aposetolo o Paulo faapea o folafolaga a le Atua na faia atu ia Aperaaamo na fuafuaina ina ia faataunuaina e ala mai i se atalii matuā faapitoa lava e tasi, o Iesu Keriso lea? Kenese 17:1-8; Kalatia 3:16; Eperu 2:14-16.

“O valoaga manino ma le faapitoa sa tuuina mai e faatatau i le faaali mai o Lē na folafolaina. Na tuuina atu ia Atamu se mautinoaga e faatatau i le afio mai o le Faaola. O le faasalaga lea na fetalaia atu i luga o Satani, ‘O le a Ou tuuina le faitaga’i i le va o oe ma le fafine, i le va foi o lau fanau ma lana fanau; o le a ia tu’imomomoina lou ulu, a’o oe, o le a ē tu’imomomoina lona mulivae’ (Kenese 3:15), o se folafolaga lea i o tatou ulua’i matua e faatatau i le faaolataga o le a galuea’iina e ala mai ia Keriso.

“Na tuuina atu ia Aperaaamo le folafolaga faapea o le a tupuga mai ia te ia le Faaola o le lalolagi: ‘O so lau fanau foi o le a manuia ai malo uma o le lalolagi.’ ‘Na fetalaia mai folafolaga ia Aperaaamo, ma so lana fanau; e le’i faapea mai, O le fanau, peiseai e to’atele, ae peitai e toatasi, O so lau fanau, o Keriso lava lea’ (Kenese 22:18; Kalatia 3:16).” – *The Acts of the Apostles*, p. 222.

Aso Gafua

Ianuari 16

2. O LE FANAU MAI O LE TAMA NA FOLAFOLAINA

a. E faapefea ona tatou iloa na iloa e Aperaaamo o folafolaga o le a o’o mai e ala mai i se tama faapitoa lava, o Iesu Keriso lea? Ioane 8:56.

“O Aperaaamo na tuuina atu ia te ia se vaaiga e faatatau i le taulaga faalelagi mo le agasala. Na ia te ia se ata e faatatau i lenei taulaga i lona lava olaga. . . . I luga o le fata faitaulaga, na ia taatiaina ai i luga le atalii o le folafolaga, le atalii lea na fa’aogatotonu i ai ona faamoemoega. . . .

“Na iloa e Aperaaamo mai i le Atua le lesone silisili lava ua faapea ona tuuina mai i tagata ola e o’o i ai le oti. O lana tatalo ina ia mafai ona ia vaai ia Keriso a’o le’i oti o ia, na taliina mai. Na ia vaai ia Keriso; na ia vaai i mea uma lava na mafai ona vaai i ai le tagata oi le natura lē tumau, ma ola pea lava. E ala i lona tuuina atu atoatoa o ia i le Atua, na mafai ai ona ia malamalama i le faaaliga a Keriso, lea sa tuuina atu ia te ia. Na faailoaina atu ia te ia faapea, i le foaiina mai e le Atua o Lona Alo e toatasi lava ina ia lavea’i ai tagata mai i le faafanoga e faavavau, na Ia faia ai se taulaga e sili atu ona tele ma sili atu ona ofoofogia nai lo soo se taulaga lava na mafai ona faia e le tagata.” – *The Desire of Ages*, pp. 468, 469.

b. O le iloaina e Aperaaamo ma Sara faapea ua mavae tausaga o Sara na te mafai ai ona toe maua se fanau, o le a le mea na la manaomia a’o le’i mafai ona la maua se tamaitiiti? Kenese 17:15-19; 18:9-14; Mareko 10:27.

“Ou te mana’o ina ia iloa e tagata uma lava mea e mafai ona faia ma avanoa o loo i ai mo i latou uma lava latou te faia Keriso ma o latou malosia ma o latou talitonuga. O le ola e natia faatasi ma Keriso i totonu i le Atua, e i ai lona sulufaiga i taimi uma lava; e mafai ona ia faapea mai, ‘Ou te mafaia mea uma lava ona o le faamalosi mai o Keriso ia te a’u’ (Filipi 4:13).” – *Country Living*, p. 28.

c. O a auala na faatusalia mai ai e le fanau mai o Isaako i se vavega, le fanau mai, i se vavega, o le tama na folafolaina, o Iesu Keriso? Isaia 7:14; Mataio 1:18-23.

“O le fanau mai o se atalii ia Sakaria, e pei o le fanau mai o le atalii o Aperaaamo, ma le tama tane a Maria, na fuafuaina ina ia a’oa’o mai ai se upu moni faaleagaga tele lava, o se lesone lea o loo tuai ona tatou a’oa’oina ma e vave foi ona tatou faagaloina. I totonu ia i tatou lava, tatou te matuā lē mafai lava ona faia se mea lelei; peitai o mea e lē mafai ona tatou faia, o le a galuea’iina e le mana o le Atua i totonu o tagata taitasi uma lava e gaua’i ma talitonu. O le faatuatua na ala mai ai le foaiina mai o le atalii o le folafolaga. O le faatuatua e toe fanaufouina ai i se olaga faaleagaga, ma mafai ai e i tatou ona faia galuega o le amiotonu.” – *The Desire of Ages*, p. 98.

3. OTI O LE TAMA NA FOLAFOLAINA

a. Faamatala pe na faapefea ona valoia mai e le Atua le maliu o le tama na folafolaina, o Iesu Keriso, e ala i le ofoina atu o Isaako e fai a'i le taulaga. Kenese 22:1-3, 9-13; Roma 8:31, 32; Isaia 53:4-7.

“O le mamoe lea na fasia e sui a'i Isaako na faatusalia mai ai le Alo o le Atua, lea na fuafuaina e faasatauroina e sui a'i i tatou. Ina ua faasalaina le tagata i le oti e ala i lona solia o le tulafono a le Atua, o le Tamā, o Lona silasila ifo i Lona Alo, na Ia fetalai mai ai i le tagata agasala, ‘Ia ē ola: Ua Ou maua se togiola.’

“O le toe faamanatuina atu i le mafaufau o Aperamo le mea moni o le tala lelei, ma le tofotofoina foi o lona faatuatua, lea na faatonuina ai o ia e le Atua ina ‘ia ia fasiotia lona atalii. O le tiga mafatia faalemafaufau na ia onosaia i aso pogisa o lona tofotofoga matautia, na faatagaina ina ‘ia ia malamalama ai mai i le mea o le a tupu ia te ia lava, le telē tele o le taulaga na faia e le Atua lē mafuatia mo le faaolataga o le tagata. E le'i i ai lava se isi tofotofoga na ono mafai ona faaosofia ai ia Aperamo lea puapuaga tiga o le loto e pei o le ofoina atu o lona atalii. Na foai mai e le Atua Lona Alo i se maliu o le tiga ma le faalumaina. O agelu na molimauina le faalumaina ma le tiga o le loto o le Alo o le Atua, e le'i faatagaina i latou e faalavelave, e pei ona faia i le lavea'iga o Isaako. E le'i i ai se leo na alaga mai faapea, ‘Ua lava lea.’ O le lavea'iina o le aiga tagata ua pa'ū, o le Tupu o le mamalu na Ia tuuina atu Lona ola. O le a se isi faamaoniga e sili atu ona malosia e mafai ona tuuina mai e faatatau i le alofa mutimutivale lē-mafuatia ma le alofa o le Atua?’” – *Patriarchs and Prophets*, p. 154.

b. O le a se mea e taua e faatatau i le faaupuga lea “lou atalii e to'atasi lava” e pei ona fetalai atu le Atua ia Aperamo? Kenese 22:2; Mareko 1:11; 1 Ioane 4:9.

“O lo tatou Tama oi le lagi na Ia tuuina mai Lona Alo pele i tiga matautia o le faasatauroga. . . . o le Alo pele o le Atua, le Faaola o le lalolagi, na faia i ai upu leaga, tauemua, amusia, ma sauāina, seia o'o ina Ia punou ifo lona ao i le oti. O le a se faamaoniga e sili atu ona tele e mafai ona tuuina mai e le Atua-lē-mafuatia e

faatatau i lona alofa ma lona mutimutivale faalelagi? [Roma 8:32].” – *That I May Know Him*, p. 20.

“Ia tatou puapuagatia nei la ma le fiafia i se mea mo Iesu, faasatauro i tatou lava i aso taitasi, ma avea ai i tatou o ni tagata ua tofusia i puapuaga o Keriso iinei, ina ia tatou tofusia faatasi ai ma Ia i Lona mamalu, ma faapaleina faatasi ai i tatou ma Ia i le mamalu, viiga, tino e ola pea, ma le ola e faavavau.” – *Early Writings*, p. 114.

Aso Lulu

Ianuari 18

4. TOE SOIFUA MAI O LE TAMA NA FOLAFOLAINA

a. Na faapefea ona faailoa mai e le Atua ia Aperaaamo faapea o le tama na folafolaina, o Iesu Keriso lea, o le a avea o Ia ma Faaola o le lalolagi? Kenese 22:7, 8, 11-13; Eperu 11:17-19.

“Ina ua tuuina atu le faatonuga ia Aperaaamo ina ia ofo atu lona atalii e fai ai le taulaga, na matuā naunau uma mai mea ola uma i le lagi. O le naunau tele na latou vaavaai mai ai i laasaga i le faataunuuina o lenei faatonuga. I le fesili a Isaako, ‘O fea o i ai le mamoe mo se taulaga mu?’ Na tali atu Aperaaamo, ‘O le a foai mai e le Atua Ia lava e fai ma mamoe’ (Kenese 22:7, 8); ma ina ua taofia le lima o le tamā a’o ia sauni e fasioti lona atalii, ma o le mamoe na foai mai e le Atua, na fasia e sui a’i Isaako – o le taimi lena na susulu mai ai le malamalama i luga o le mealilo o le faaolataga, ma e o’o lava i agelu, na sili atu ai iina le manino o lo latou malamalama i le auala matagofie ofoofogia na faia e le Atua mo le faaolataga o le tagata.” – *Patriarchs and Prophets*, p. 155.

b. O le a le mea moni matagofie na faamautinoaina atu ia Aperaaamo a’o ia taofimau atu i le folafolaga lea, “O le a valaauina lau fanau ia Isaako” (Kenese 21:12)? Kenese 22:5; Eperu 11:18, 19.

“Na faamalosia e [Aperaaamo] lona loto e ala i lona manatunatu i faamaoniga o le agalelei ma le faamaoni o le Atua. O lenei atalii na foaiina mai i se tulaga e le’i manatunatu i ai; ma e lē o i ai ea se aiā i Lē na foaiina mai le meaalofo taua Na te toe manaomia atu ai Lana lava meatotino? Ona toe manatunatu lea o le faatuatua i le folafolaga lea, ‘O le a valaauina lau fanau ia Isaako’ – o se fanau e lē mafaitaulia

e pei o oneone i luga o le matafaga. O Isaako o le atalii lea o se vavega, ma e lē mafai ea e le mana na foaiina mai ia te ia le ola, ona toe foai mai le ola ia te ia? O le vaavaai atu o Aperamo i tua atu o mea e vaaia, na ia taofimauina ai upu faalelagi nei, ‘na manatu o ia e mafaia e le Atua ona toe faatu mai ia te ia nai le oti’ (Eperu 11:19).” – Ibid., pp. 151, 152.

c. Na faapefea ona faatusa mai e lenei upu moni le tama moni na folafolaina, o Iesu Keriso? Galuega 3:25, 26; 1 Peteru 1:18-21.

“[O le Alo o le Atua] na Ia toe tu mai nai le tuugamau ma faasilasila mai i luga o le tuugamau matala o Iosefa, ‘O A’u o le toe tu, ma le ola’ (Ioane 11:25). O lē e tutusa ma le Atua na ia ui atu i le oti mo i tatou. Na tofo i le oti mo tagata taitasi uma, ina ia tofusua ai tagata taitasi uma i le ola e faavavau e ala atu ia te Ia.” – *In Heavenly Places*, p. 13.

Aso Tofi

Ianuari 19

5. TOFI O LE TAMA NA FOLAFOLAINA

a. O le a le tofi na folafola mai e le Atua ia Aperamo ma lona atalii? Kenese 17:7, 8; Salamo 105:6-11. E faapefea ona faatusa mai e lenei tulaga le tofi o Keriso? Tanielu 7:13, 14, 18; Mataio 25:31-34.

“E lē mafai e gagana ona faamatalaina le taua o le tofi faavavau. O le viiga, oa, ma le mamalu ua ofo mai e le Alo o le Atua e matua lē mafuatia lona taua o lea e lē mafai ai e le malosia o tagata poo agelu foi le tuuina mai o soo se manatu tonu e faatatau i lo latou taua ma le aoga, o lo latou silisiliese atoatoa, ma le matagofie.” – *Testimonies*, vol. 2, p. 40.

b. E faapefea ona mafai ona tatou maua le mautinoaga e iloa ai o le a amanaia e le Atua Ana folafolaga ma foai mai i Ana fanau le Eleele Folafolaina? Eperu 6:13-18; Ioane 14:1-3.

“Ua leva ona tatou faatali mo le toe fo’i mai o lo tatou Faaola. Ae ui i lea, e matua maumautino lava le folafolaga. E lē o toe umi ae tatou i ai loa i totonu o lo tatou aiga folafolaina mai. O iina o le a ta’ita’i ai e Iesu i tatou i tafatafa o vaitafe ola o loo tafe mai mai i le nofoalii o le Atua ma o le a Ia faamatalaina mai ia i tatou auala pogisa na Ia ta’ita’ia ai i tatou i lenei lalolagi, ina ia fa’aatoatoaina ai a tatou amio. O iina o le a tatou vaaia ai i le vaai lē-mafaanenefuina le matagofie o Etena ua toe faafoisiaina. O lo tatou lafoina atu i aao o Iesu o pale na Ia tuuina i luga o ō tatou ulu, ma o lo tatou fetagofi atu i a tatou kitara auro, o le a tatou faatumuina ai le lagi atoa i viiga ia te Ia o loo afio i luga o le nofoalii.” – Ibid., vol. 8, p. 254.

Aso Faraile

Ianuari 20

FESILI TOE FAAMANATU

- 1. Na faapefea ona faailoa e le Atua ia Aperamo le tala lelei?**
- 2. O le a le vavega o loo faailoa mai ai o Keriso na auina mai i le lagi?**
- 3. O faapefea ona faaalua e le mea na tupu ia Aperamo ma Isaako le loloto o le taulaga na faia e le Atua mo le aiga tagata?**
- 4. Aisea e taua tele ai le toe soifua mai o Iesu i le tagata talitonu?**
- 5. O le a se mea e lē tataua ona tatou faagaloia a’o tatou faatalitali atu i le eleele ua folafolaina mai e fai mo o tatou tofi?**

Lesona 4

Sapati, Ianuari 28, 2017

O Atalii e To’alua o Aperamo

“Auā ua tusia, sa iā Aperamo atalii e to’a lua, o le tasi na fanau mai i se auaua fafine pologa, a’o le isi i se fafine saoloto” (Kalatia 4:22).

“O le faatuatua e lē o se lagona fiafia osovale; o le faatuatua ua na o le talitonu atoatoa lea i le Atua i le upu ua Ia fetalai mai – ma talitonu o le a Ia faataunuuina Ana folafolaga auā na Ia fetalai mai o le a Ia faataunuuina.” – *Our High Calling*, p. 119.

Ulua'i Aso

Ianuari 22

1. O LE ATALII O LE FOLAFOLAGA

a. Aisea o loo faaigoaina ai Isaako o ia o le atalii o le folafolaga? Kenese 15:2, 3; 17:15, 16; 18:9-14 (faatusatusa ma le Kalatia 4:22, 23, 27, 28).

b. Na faapefea ona taumafai Aperamo ma Sara e fesoasoani i le Alii e faataunuu Lana folafolaga e faatatau i se atalii? Kenese 16:1-4.

“O Aperamo na ia talia ma le lē tu’ufesili le folafolaga e faatatau i se atalii, peitai na te le’i faatali mo le Atua Na te faataunuuina Lana upu i Lana lava taimi ma Lana lava auala. O se faatuai na faatagaina ina ia tofotofoina ai lona faatuatua i le mana o le Atua; peitai na ia lē onosaia le tofotofoga. O le manatu o Sara faapea e lē mafai ona foaiina mai ia te ia se tamaititi i lona soifuaga matua, o lea na ia fautuaina ai, e avea o se fuafuaga atonu o le a faataunuuina ai le fuafuaga a le lagi, faapea, o le tasi o ana auauna fafine e tatau ona avea e Aperamo e fai ma ana avā lona lua. O le tele o avā a tane sa i ai, na matua taatele lava o lea e le’i toe manatu ai i ai faapea o se agasala lea, peitai e lē’i itiiti ifo le avea o lea agasala o se soliga o le tulafono a le Atua, ma na matua matautia lava lona leaga i le paia ma le filemu o le sootaga i le aiga. O le faaipoipoga a Aperamo ma Akara na i’u i le leaga, e lē’i gata ina leaga i lona lava aiga, ae faapena ai foi i augatupulaga o le lumanai.” – *Patriarchs and Prophets*, p. 145.

Aso Gafua

Ianuari 23

2. O SE ATALII O LE NOFO POLOGA

a. O le a le tali a le Atua ina ua tuuina atu e Aperamo Isamaeli e avea ma atalii o le folafolaga? Kenese 17:15-21.

“Ina ua toeitiiti lava a selau tausaga o Aperamo, o le folafolaga o se atalii na toe faaluaina atu ia te ia, faatasi ai ma le mautinoaga faapea, o le suli oi lumanai o le a fanau mai ia Sara. Peitai e lē’i malamalama Aperamo i le taimi lena i le folafolaga. O lona mafaufau na liliu vave atu lava ia Isamaeli, ma ia taofi atu ai i le talitonuga faapea o fuafuaga alofa a le Atua o le a faataunuuina e ala mai ia te ia. I lona alofa mo lona atalii o lea na ia alaga ai, ‘E, ia ola Isamaeli i Ou luma!’ Ae na toe tuuina mai le folafolaga, i upu e le’i mafai ona sese: ‘O Sara lau avā o le a fanau moni mai lava e ia se atalii mo oe; o le a ē faaigoa foi ia te ia o Isaako: o le a Ou faatumauina foi La’u feagaiga ma ia’ (Kenese 17:18, 19).” – *Patriarchs and Prophets*, p. 146.

b. Aisea na musu ai le Atua na te taliaina Isamaeli e avea ma tama na folafolaina? Kalatia 4:22, 23, 30; Roma 14:23 (vaega mulimuli).

“O le leai o se faatuatua ia Aperamo ma Sara na i’u i le fanau mai o Isamaeli, o le niniina faatasi lea o le fanau amiotonu ma ē e lē amioatua. O le aafiaga o le tamā i lona atalii na feteenai ma le aafiaga o le aiga ifo i tupua o lona tina atoa ai ma le sootaga a Isamaeli i ana avā faapaupau.” Ibid., p. 174.

c. O le a le upu moni aoga na semanu e misia e Aperamo pe ana faapea e talia e le Atua Isamaeli e fai ma atalii na folafolaina? Roma 4:1-5, 21, 22.

“O le tau e lē maua ona o galuega, ne’i gugutu se tasi; peitai e maua uma lava i le alofa tunoa.” – *Christ’s Object Lessons*, p. 401.

“A tatou malolo taitoatasi uma loa i luga ia Keriso, faatasi ai ma le mautinoaga atoa o le faatuatua, ma tatou talitonu tasi ai lava i le mana amiotonu o Lona toto e fufuluina ai i tatou mai i agasala uma, o le a tatou maua loa le filemu i lo tatou talitonu i upu ia ua folafola mai e le Atua e mafai ona Ia faatinoina.” – *Selected Messages*, bk. 3, p. 181.

“[Filipi 4:4-7]. O le folafolaga lava ia e leai sona aoga seivagana ua ou talitonu atoa lava faapea o Lē ua fetalai mai le folafolaga, e matua mafai lava ona Ia faataunuuina, ma e lē mafuatia i Lona mana na te faia ai mea uma lava ua Ia fetalai mai.” – *This Day With God*, p. 156.

3. FANAU A LE NOFO POLOGA

a. Faamatala poo le fea le vasega o tagata o loo faatusa faaleagaga mai e Isamaeli ma lona tina o Akara, ma aisea foi. Kenese 16:4-6; Kalatia 4:22, 23.

b. Aisea o loo faamatala ai e le aposetolo o Paulo tagata Iutaia sa nonofo i Ierusalem ma ona taimi faapea o ni auauna nofo pologa, e faapei o Akara ma Isamaeli? Ioane 8:31-36; Roma 9:6-8.

“O tagata taitasi uma lava e mumusu e tuuina atu o ia i le Atua, ua i lalo foi o le puleaga a se isi malosi. E lē o pulea e ia, ia lava. Atonu na te tautala e faatatau i le saolotoga, peitai o loo i ai o ia i le nofo pologa sili ona malaia. E lē o faatagaina o ia na te vaai i le matagofie o le upu moni, auā o lona mafaufau o loo i lalo o le puleaga a Satani. A’o ia faamalieseseina o ia faapea o loo ia mulimuli i filifiliga a lona lava mafaufau, na te usitai i le loto o le perenise o le pouliuli. Na afio mai Keriso e talepe filifili o le nofo pologa i le agasala mai i le loto.” – *The Desire of Ages*, p. 466.

“Ua matua tele mea ua faia e le Atua ina ia mafai ai e i tatou ona saoloto i totonu ia Keriso, saoloto mai i le nofo pologa o masaniga sese ma lagona leaga. Uo talavou pelē, o le a ē lē tauivi ea ina ia ē saoloto i totonu ia Keriso?” – *Our High Calling*, p. 29.

c. O ai, ma o le a foi le mea na tuuina i ai e tagata Iutaia i le tino (le fanau i le tino a Aperamo) lo latou faatuatuaga i le mauaina o le faamanuiaga a le Atua? Ioane 8:37-40; Filipi 3:3-9; Kalatia 6:12, 13.

“O tagata Iutaia sa latou fai mai na latou tupuga mai ia Aperamo; peitai o lo latou lē faia o galuega a Aperamo, na latou faamaonia mai ai e lē o i latou o ni ana fanau moni. E na o i latou lava e faamaonia mai o loo latou loto gatasi faaleagaga ma Aperamo e ala i lo latou usitai i le siufofoga o le Atua, o i latou ia e ta’ua o fanau moni na tupuga mai ia Aperamo.” – *Christ’s Object Lessons*, p. 268.

“Fai mai Paulo ‘o la le amiotonu i le tulafono’ – i galuega vaaia i fafo – e le’i ‘mata’uleagaina’ ai o ia (Filipi 3:6); peitai ina ua ia vaaia ma iloa le uiga faaleagaga

o le tulafono, na ia vaaia ai loa o ia o le tagata agasala. O le faamasinoina o ia i le mata'itusi o le tulafono e pei ona faaaogaina ai e tagata i le olaga vaaia i fafo, na ia manatu ai na ia vavae ese mai i le agasala; peitai ina ua ia vaai i totonu o le loloto o ona poloaiga paia, na ia vaaia ai ia lava e pei ona silafia o ia e le Atua, na ia ifo ifo i le faalumaina ma fa'aali lona agasala.” – *Steps to Christ*, pp. 29, 30.

Aso Lulu

Ianuari 25

4. O SE FAATUSA

a. A tatou talitonu faalagolago i a tatou lava galuega mo le taliaina o i tatou i le Atua, e aunoa ma le taliaina o i tatou i totonu ia Keriso, o le a le feagaiga ua tatou i ai i lalo? Kalatia 4:21-25; 3:10; 2 Korinito 3:14, 15.

“O le nuu latou te lē'i iloa le tumu i le agasala o ō latou lava loto, ma a aunoa ma Keriso, na matuā lē mafai lava mo i latou ona tausia le tulafono a le Atua; ma na latou ulufale atu ai loa ma le naunau i le feagaiga ma le Atua. O lo latou manatu faapea na mafai ona latou faatuina la latou lava amiotonu, o lea na latou faailoa mai ai, ‘O mea uma lava ua fetalai mai ai Ieova o le a matou faia, ma usitai’ (Esoto 24:7); . . . peitai e na o ni nai vaiaso ititi lava na mavae atu ae latou talepeina loa la latou feagaiga ma le Atua, ma latou ifo ai i lalo e tapua'i i se tupua ua ta. E le'i mafai ona latou faamoemoe mo le fiafia mai o le Atua e ala i se feagaiga na latou talepeina; ma o lenei; o lo latou iloaina o lo latou agasala ma lo latou manaomia o le faamagaloga, o lea na aumaia ai i latou ina ‘ia latou lagonaina lo latou manaomia o le Faaola lea na faaalia mai i le feagaiga ma Aperamo ma fa'aatania mai i taulaga fasia. O lenei la, e ala i le faatuatua ma le alofa na fusia atu ai i latou i le Atua e ave ma o latou faaola mai i le nofo pologa i le agasala. O lenei la ua latou sauni e faatāuaina faamanuiaga o le feagaiga fou. . . .

“O le ‘feagaiga fou’ na faatuina mausali i luga o ‘folafolaga e sili atu ona lelei’ – le folafolaga lea o le faamagaloina o agasala ma le alofa tunoa o le Atua e faafouina ai le loto ma aumaia ai le loto ina ia loto gatasi ma tapulaa o le tulafono a le Atua. . . .

“O le tulafono lava lea e tasi sa vaneina i papama'a, ua tusia foi e le Agaga Paia i le loto. E aunoa ma lo tatou feoa'i solo e faatu la tatou lava amiotonu, tatou te taliaina le amiotonu a Keriso. O lona toto e togiola a'i a tatou agasala. O lona usitai ua taliaina mo i tatou. O le a fua mai loa e le loto ua faafouina e le Agaga Paia ‘fua

o le Agaga'. E ala i le alofa tunoa o Keriso o le a tatou ola ai i le usitai i le tulafono a le Atua ua tusia i o tatou loto. O lo tatou mauaina o le Agaga o Keriso, o le a tatou savavali ai e pei ona Ia savali." – *Patriarchs and Prophets*, pp. 371, 373.

b. Aisea e faamaonia ai e lē mafai e se tagata ona fa'aamiotonuina e ia, ia lava i luma o le Atua e ala i le tausia o le tulafono? Kalatia 2:21; 3:11, 12.

"Ana leai le maliu o Keriso e togiolaina a'i, o le a leai se mea i totonu ia i tatou e mafai ona fiafia mai i ai le Atua. O le lelei uma lava faalenatura o le tagata, e lē aoga lea i le silafaga a le Atua. Na te lē fiafia i soo se tagata na te taofia ma faatumauina lona natura tuai, ma faapena ona lē faafouina ai o ia i le iloa ma le alofa tunoa e iloa ai o ia o se foafoaga fou i totonu ia Keriso." – *God's Amazing Grace*, p. 66.

Aso Tofi

Ianuari 26

5. SAUAGA FA'ALE-USO

a. O le a se mea o loo faaaoga e le aposetolo o Paulo e fa'aata mai ai le sauāga faa-Iutaia o le ekalesia kerisiano? Kalatia 4:28, 29; Kenese 21:6-10.

b. Aisea o le a sauāina ai le fanau a le agaga i taimi uma lava e le fanau a le tino? Ioane 15:17-22; Ioane 3:19, 20; Kalatia 5:17 (vaega muamua).

"O Kaino na ia ita i lona uso ma na ia fasiotia o ia, e lē ona o se sese na faia e Apelu, peitai 'ona o ana lava galuega na leaga, a'o galuega a lona uso sa tonu' (1 Ioane 3:12). . . . O le olaga usitai o Apelu ma lona faatuatua lē maliua o se a'oa'iga lea ia Kaino i taimi uma lava. . . . O le sili atu o le pupula o le malamalama mai i le lagi lea o loo lafoia atu mai i amio a auauna faamaoni a le Atua, o le sili atu foi lena o le manino o le faaaliaina o agasala a tagata lē amioatua, ma o le sili atu foi lena o le finafinai o le a i ai a latou taumafaiga e faaumatia i latou e faalavelave i lo latou filemu." – *Patriarchs and Prophets*, p. 74.

O ulua'i kerisiano o ni tagata faapitoa moni lava. O ō latou uiga lē mata'uleagaina ma lo latou faatuatua mausali, o se a'oa'iga faifai pea lea na

faalavelaveina ai le filemu o le tagata agasala. E ui lava ina to'aitiiti lo latou fuainumera, e leai ni a latou oa, tofiga maualuluga, poo ni o latou igoa mamalu, ae na avea lava i latou o se mea mata'utia i tagata amio leaga i soo se mea lava na iloa ai a latou amio ma a latou mataupu. . . . O le mafuaaga lava lea e tasi na mafua ai ona teena ma faasatauroina le Faaola e tagata Iutaia – auā o le mamā ma le paia o Lana amio, o se a'oa'iga lea i taimi uma i lo latou loto faapito ma a latou amio pepelo lē faamaoni. Na amata mai lava i aso o Keriso seia o'o mai lava i le taimi lenei, o Ona so'o faamaoni ua latou faaosofiaina le ita ma le tetee mai o i latou e fiafia ma mulimuli i ala o le agasala.” – *The Great Controversy*, p. 46.

Aso Faraile

Ianuari 27

FESILI TOE FAAMANATU

1. O le a le auala e tasi e mafai ai ona faataunuuina folafolaga a le Atua?
2. Aisea o le a lē taliaina ai lava e le Atua galuega o le tino e avea ma amiotonu?
3. Aisea e matua lē mafai ai lava ona tatou tuuina lo tatou talitonuga i o tatou tupuaga, o ō tatou aiga i le tino, poo a tatou galuega?
4. Aisea e matua lē mafai ai ona ta'uamiotonuina i galuega o le tulafono?
5. Faamatala le ituaiga taua e tataua ona iloa e kerisiano e o'o mai ia i latou ona o lo latou faatuatua.

Lesona 5

Sapati, Fepuari 4, 2017

O le Fanau Moni a Aperaaamo

“O lenei, ia iloa e outou, o ē faatuatua o fanau i latou a Aperaaamo” (Kalatia 3:7).

“O tagata taitasi uma lava o le a faamaulaloina o ia e ia lava e pei o se tamaitiiti, o lē o le a talia ma usitai i le upu a le Atua i le uiga faigofie o se tamaitiiti, o le a faitauina faatasi o ia ma le au filifilia a le Atua.” – *Our High Calling*, p. 77.

Ulua'i Aso

Ianuari 29

1. O LE FANAU MONI A APERAAMO

a. O ai ia o loo fai mai le Tusi Paia o fanau moni a Aperaaamo o tagata Isaraelu moni nā? Roma 9:6-8; Kalatia 3:7-9.

“Na tuuina atu ia Isaia ina ‘ia matuā fa’amanino atu lava ia Iuta le mea moni faapea, i le lotolotoi o tagata Isaraelu o le Atua, o le a faitaulia ai le to’atele o i latou e lē’i tupuga mai ia Aperaaamo i le tino. O lenei a’oa’oga e le’i tutusa ma le tapuaiga i ona taimi, ae na ia faailoa atu lava ma le lē fefe feau na tuuina atu ia te ia mai i le Atua ma aumaia ai le faamoemoe i le tele o loto na faananau atu mo faamanuiaga faaleagaga ia na folafolaina atu i le atalii o Aperaaamo.” – *Prophets and Kings*, p. 367.

b. E faapefea ona mafai ona avea tagata o nuu ese ma fanau moni a Aperaaamo i le taimi lenei, o ē e lē o ni ana fanau moni i le tino? Roma 9:30; 4:11, 12, 16, 17.

“O i latou uma lava o le a avea ma fanau o le faatuatua e ala atu ia Keriso, e tatau foi ona avea i latou ma fanau a Aperaaamo; o i latou nei na fai mo i latou le folafolaga o le feagaiga; e pei o Aperaaamo, na valaauina i latou ina ia latou puipuia le tulafono a le Atua ma le tala lelei a Lona Alo ma ia faailoa atu i le lalolagi.” – *Patriarchs and Prophets*, p. 476.

Aso Gafua

Ianuari 30

2. O FANAU-FAI A APERAAMO

a. E ala i lo tatou faatuatua ia Keriso le atalii o Aperaaamo lea na folafolaina mai, o le a le aiga ua fa’atamafaiina atu i ai i tatou? Roma 8:14-16; Kalatia 4:4-7.

E finagalo le Atua ina ia faaolaina tagata uma; auā e matua atoatoa lava le togiola ua faia, i le foaiina mai o Lona lava Alo e to’atasi ina ia totogiina ai le tau o le toe fa’atauina atu o le tagata. O i latou e fano, o le a fano ona latou te mumusu e fa’atamafaiina i latou e avea ma fanau a le Atua e ala atu ia Keriso Iesu. O le loto faamaualuga o le tagata e taofia ai o ia mai i lona taliaina o auala ua uma ona faia mo le faaolataga.” – *Our High Calling*, p. 78.

b. E faapefea ona faia e le maliu o Iesu Keriso se tagata e avea ma atalii poo se afafine o le Atua, o se atalii poo se afafine o le faatuatua, ma o ai e faatatau i ai lenei tulaga? Kalatia 3:27-29.

“Atonu e faatino e tagata galuega tetele lava i mata o le lalolagi; o mea e mafai ona latou faia atonu e tele ma silisili i le vaaiga ma manatu o tagata, peitai o taleni uma lava, o le poto uma lava, o le malosi uma lava o le lalolagi, o le a lē mafai ona liua ai leamio ma faia ai se atalii malaia o le agasala e avea o se atalii o le Atua, o se suli o le lagi. E leai se malosi o tagata e ta’uamiotonuina ai le loto, e faapaiaina ai le loto. . . . O le meaalofo silisili lava a le lagi, le Alo pele lava e toatasi o le Tamā, e tumu i le alofa tunoa ma le faamaoni, e na o Ia lava e to’atasi e mafai ona Ia toe fa’atauina mai le tagata agasala. . . . O le maliu o Keriso i luga o le satauro o Kalevario o se manatunatuga lea e matuā sili atu nai lo le malosi mata’utia o le agasala; ma a una’i mai se lagona o le agasala i le loto o le tagata agasala, ma o le avega ua foliga mai ua lē mafai ona tauaveina, e valaaulia mai o ia e Iesu ina ‘ia ia vaai a’e ia te Ia ma ola ai.” – *The Signs of the Times*, May 2, 1892.

c. Faamatala pe aisea e o mai ai le fanau a Aperamo mai i ituaiga uma ma malo ae lē na o Israelu. Faaaliga 7:9, 10; Kenese 17:4-6; Galuega 10:34, 35.

“E le’i amanaiaina e Keriso ni eseese i malo eseese poo tofiga ma tulaga poo poloaiga foi. O le au tusiupu ma le au faresaio na latou naunau ina ia faamanuiaina na o i latou ma lo latou malo i meaalofo uma lava a le lagi ma lē faamanuiaina ai isi tagata uma o le aiga o le Atua i totonu o le lalolagi. Peitai o Keriso na ia afio mai e talepe i lalo pa puipui uma lava o loo vāevāeina i ai malo. Na Ia afio mai e faailoa mai faapea o Lana meaalofo o le alofa tunoa ma lona alofa e matuā lē mafai ona taofia i se tagata poo se malo e tasi e pei lava ona lē mafai ona

taofia i se malo e tasi, le ea, malamalama, poo matāua foi o le timu o loo faafouina ai le laueleele.” – *Testimonies*, vol. 9, p. 190.

Aso Lua

Ianuari 31

3. O FANAU SESE A APERAAMO

a. Aisea na lē agavaa ai le to’atele o tagata moni na tupuga mai ia Aperaaamo i le tino, i le avea o i latou o ni tagata Isaraelu moni i le silafaga a le Atua? Roma 10:1-4.

“O tagata Iutaia, na latou vavaeeseina i latou mai i le Atua e ala i a latou agasala. E le’i mafai ona latou iloa le tāua loloto faaleagaga o la latou auunaga faafa’atusa. I la latou lava amiotonu i o latou lava manatu, o lea na latou talitonu ai i a latou lava galuega, i taulaga fasia ma sauniga, e aunoa ma lo latou faalagolago i le amiotonu a Lē na faasino atu i ai nei mea uma lava. Na faapena ona latou feoa’i solo ai e faatuina la latou lava amiotonu’ (Roma 10:3), na latou fausia a’e ai i latou lava i se tapuaiga faafoliga tautū i sauniga faatinoina a i latou lava. O le lē i ai ia i latou o le Agaga ma le alofa tunoa o le Atua, o lea na latou taumafai ai ina ia fa’aatoatoaina le leai o sa latou amiotonu e ala i se tausiga mae’ae’a o sauniga ma faatinoga faaletapuaiga. O le lē faamalieina o ō latou loto i sauniga na filifilia atu e le Atua lava Ia ia i latou, o lea na latou fa’aleagaina ai poloaiga faalelagi i tulafono mamafa e lē mafaitaulia na latou fafauina e i latou lava. O le sili atu o le telē o le mamao o lo latou va ma le Atua, o le sili atu foi lena o lo latou vilivilitai mae’ae’a i le tausaiaina o nei faatinoga.” – *Prophets and Kings*, pp. 708, 709.

b. O le a le auala e tasi lava e mafai ai ona ta’uamiotonuina i tatou i luma o le Atua? Kalatia 3:11, 12; 2:16. O le a le suiga o le a faamaonia mai i le olaga o i latou ua ta’uamiotonuina i le faatuatua?

“O le ta’uamiotonuina e maua atoatoa lava i le alofa tunoa ma e lē maua mai i ni galuega e mafai ona faia e le tagata pa’ū.” – *Faith and Works*, p. 20.

“O le loto faamaualuga e finafinau ina ‘ia ia maua mai le faaolataga i ana galuega; peitai o lo tatou avanoa ma lo tatou agavaa mo le lagi, e maua lea i le amiotonu a Keriso. E lē mafai ona faia e le Alii se mea e tasi agai i le toe lavea’iina

mai o le tagata seivagana ua faatalitonuina le tagata i lona lava vaivai, ma aveesea mai ia te ia lona faalagolago atoa ifo lava ia te ia, na te gaua'iina atu ai ia lava i le puleaga a le Atua. Ona mafai loa lea ona ia maua le meaalofo o loo faatali le Atua Na te foaiina mai.” – *The Desire of Ages*, p. 300.

“O le tagata o loo taumafai e o’o atu i le lagi i ana lava galuega i le tausaiaina o le tulafono, o loo ia taumafai e faia se mea e lē mafai ona ia faia. E lē o i ai se saogalemu mo le tagata e na o se tapuaiga-faale-tulafono o loo ia te ia, o se foliga lea o le amioatua. O le olaga o le kerisiano, e lē o se suiga lea poo se toe faaleleiga lea o le olaga tuai, peitai o se liuaga atoa lava lea o le natura. O loo i ai le oti o le tagata ia te ia lava ma le agasala, ma se olaga fou atoatoa lava. O lenei suiga e na o le galuega mamana lava a le Agaga Paia e mafai ai ona maua.” – *Ibid.*, p. 172.

Aso Lulu

Fepuari 1

4. O AUAUNA A APERAAMO

a. O i latou e lē taliaina le faatuatua o Aperaaamo i totonu ia Keriso faapea o Ia lea o le tama na folafolaina, o loo faaigoaina i latou o auauna, ae lē o ni atalii poo ni afafine. O le a le mea o le a tupu ia i latou? Kenese 16:3-6; Kalatia 4:30, 31.

“O Noa ma lona aiga sa i totonu o le va’a, ‘ma na tapunia o ia i totonu e le Alii.’ . . . O le faitoto’a tele, lea sa lē mafai ona tapunia e i latou sa i totonu, na tapunia lemu atu lava i lona tulaga e lima lē vaaia. O Noa na tapunia i totonu, ma o ē na teena le alofa tunoa o le Atua na taofia i latou i fafo. O le faamau a le lagi sa i luga o lena faitotoa; o le Atua na tapunia, ma e na o le Atua lava na mafai ona tatalaina. E faapena foi, a faamuta loa e Keriso Lana aioiga mo le tagata agasala, a’o Ia le’i afio mai i ao o le lagi, o le faitotoa o le alofa tunoa o le a tapunia loa. O le alofa tunoa o le lagi, o le a ia lē toe taofia loa tagata amioleaga, ma o le a pulea atoa loa e Satani i latou ua latou teena le alofa tunoa.” – *Patriarchs and Prophets*, p. 98.

b. O ai, ma o a mea o loo latou auauna moni lava i ai? Ioane 8:31-35, 39-44.

“O lē tou te tuuina atu i ai outou e fai ma auauna e anaana i ai, o ana auauna outou tou te usitai i ai’ (Roma 6:16). Afai tatou te faamalie saoloto le ita, tuinanau, mana’o matape’ape’a, matau’a, loto faapito, poo se isi lava agasala, ua avea loa i tatou ma auauna a le agasala. ‘E leai se isi e mafai ona ia auauna i matai e to’a lua’ (Mataio 6:24). Afai tatou te auauna i le agasala, e le mafai ona tatou auauna ia Keriso.” – *The Review and Herald*, November 15, 1887.

c. Aisea o le a lē mafai ai lava e i latou ua teena Keriso ona latou ulufale atu i le laueleele o Kanana lea sa folafolaina ia Aperamo ma lona atalii? Eperu 3:17-19; Galuega 4:10-12; Kalatia 3:9.

“E fa sefulu tausaga na taofia ese ai Isaraelu anamua e le lē talitonu, muimui, ma le tetee fouvale mai i le eleeele o Kanana. O agasala lava foi ia ua faatuaiina ai le ulufale atu o Isaraelu o le taimi lenei i le Kanana faalelagi. E leai se sese o folafolaga a le Atua i vaega nei e lua. O le lē talitonu, o le faalelalolagi, ma le lē tuuina atu atoatoa i le Atua, ma finauga i le lotolotoi o i latou o loo fai mai o i latou o tagata o le Atua, lea ua taofia ai i tatou i totonu o lenei lalolagi o le agasala ma le faanoanoa i le tele o tausaga.” – *Evangelism*, p. 696.

Aso Tofi

Fepuari 2

5. O SE LAPATAIGA I LE EKALESIA

a. O le a le lapataiga na tuuina atu i le ekalesia i Kalatia, ma aisea foi? Kalatia 3:1-6; 4:7-11.

“O le faaolataga lea na galuea’iina e lo tatou Alii mo i tatou i luga o le satauro o Kalavario na fuafuaina ina ia aumaia ai i tatou i le usitai atu i le tulafono a le Atua, ma mafai ai, e ala i Lana amiotonu ua foaiina mai ia i tatou, ona tatou tausia le tulafono a le Atua. . . .

“E leai se mea e sili ona inosia i le Atua e pei o le agasala. E aunoa ma le faalēaogaina o le tulafono a le Atua e ala i le fa’aauau ai pea i le agasala, o tagata liua moni uma lava o le a savavali i le ala o le usitai faamaulalo i poloaiga uma lava a le Atua. O le a latou sailia le Tusi Paia ina ia latou iloa ai le upu moni. O ai na fa’avaleaina le tagata lē salamo, le tagata solitulafono, ua ia filifilia ai le agasala a

ua lē o le usitai? O le mana o Satani lea na sau ia Atamu ma Eva i Etena, le mana taufaasese, taufaavalea faaoleole o le agelu pa'ū.” – *The Upward Look*, p. 209.

b. E faapefea ona tulai mai tauiviga a Aperamo i lona lava faatuatua, e avea ma lesona ia i tatou? Kenese 15:3-6; 17:17, 18; Eperu 4:1, 2. A'o le isi itu, o le a le mea e aumai e le faatuatua moni ia i tatou? 1 Ioane 5:4, 5.

“O le olaga o le kerisiano e tataua ona avea ma olaga o le faatuatua, manumalo, ma le olioli i le Atua E mafai e le Atua ma Na te naunau e foai mai i Ana auauna le malosia uma lava latou te manaomia, ma foai atu ia i latou le poto e manaomia e o latou manaoga eseese. O le a matuā sili atu ona Ia faataunuina manaoga silisili lava o i latou e tuu atu lo latou talitonuga ia te Ia.” – *The Faith I Live By*, p. 126.

Aso Faraile

Fepuari 3

FESILI TOE FAAMANATU

- 1. O le a le taua o le faatuatua i le kerisiano?**
- 2. Aisea e mafai ai ona ta'ua e le kerisiano le Atua o Ia o lona tamā?**
- 3. E faapefea ona mafai ona tatou sosola ese mai i le faamalaiaina o i tatou e le Atua?**
- 4. O le a le eseese i le va o le avea ma auauna a Aperamo ma le avea ma ona atalii poo sona afafine?**
- 5. E faapefea ona mafai ona faavaleaina faaseseina faaoleole i tatou e le tiapolo i le faaleagaina o lo tatou faatuatua?**

Lesona 6

Sapati, Fepuari 11, 2017

O le Feagaiga e Faavavau

“O le a Ou faatumauiina La'u feagaiga i le va o A'u ma oe ma lau fanau pe a mavae atu oe i a latou augatupulaga e fai ma feagaiga e faavavau, ia fai A'u ma Atua ia te oe ma lau fanau pe a mavae atu oe” (Kenese 17:7).

“O le feagaiga o le alofa tunoa e lē o se upu moni fou lea, auā sa i ai lava i le finagalo o le Atua mai lava i le vavau atoa. O le mafuaaga lea o loo faaigoaina ai o le feagaiga e faavavau.” – *The Signs of the Times*, August 24, 1891.

Faitauga Fautuaina: *The Faith I Live By*, pp. 76-78, 360-364.b

Ulua’i Aso

Fepuari 5

1. O LE FEAGAIGA E FAAVAVAU

a. O le a se mea o loo faailoa mai ai faapea o le feagaiga na faia ma Aperamo e tutusa ma le feagaiga lea na faamausaliina e Keriso i Kalevario? Kenese 22:16; Eperu 6:13-18; 9:16.

“O le feagaiga ma Aperamo na faamausaliina i le toto o Keriso, ma o loo faaigoaina o le feagaiga ‘lona lua,’ poo le feagaiga ‘fou’, auā o le toto lea sa faamauina ai, na faamaligiina ina ua mavae le toto o le feagaiga muamua. O le feagaiga fou na aoga lava i aso o Aperamo, o loo faamaonia mai lea i le mea moni lea, na faamausaliina i le taimi lena e le folafolaga ma le tautoga a le Atua, - ‘o mea e lua e lē mafai ona liua, e lē’i mafai ona pepelo ai le Atua.’ Eperu 6:18.” – *Patriarchs and Prophets*, p. 371.

b. O le a le mea na folafolaina mai i lalo o lenei feagaiga ma na faapefea ona tali atu Aperamo? Kenese 17:1-8; 15:6; 26:5; faatusatusa ma le Kalatia 3:8, 16; Roma 4:20-22.

“I tagata uma lava, o lenei feagaiga na ofo mai ai le faamagaloga ma le alofa tunoa fesoasoani o le Atua mo le usitai i le lumanai e ala i le faatuatua ia Keriso. Na folafolaina mai ai foi ia i latou le ola e faavavau i aiaiga o le faamaoni i le tulafono a le Atua.” – *Ibid.*, p. 370.

“O le tulafono a le Atua o le faavae lea o lenei feagaiga, o se faatulagaga lea mo le toe aumaia o tagata i le loto gatasi ma le finagalo faalelagi, ma tuuina ai i latou i le tulaga e mafai ai e i latou ona usitai i le tulafono a le Atua.” – *Ibid.*, p. 371.

2. O SE FESOOTAIGA E FAAVAVAU

a. O le a le auala na faailoa mai ai e le Atua le sootaga o le feagaiga na Ia faamausalina ma Aperaaamo ma lona atalii? Levitiko 26:12. Faatusatusa ma le Kenese 17:7, 8; Teuteronome 14:2; 29:13.

b. O le a se mea na foai e le Atua ia Aperaaamo e fai ma faamau o le sootaga o le feagaiga, ma aisea foi? Kenese 17:11; Roma 4:11.

“I le taimi lea, o le sauniga o le peritome na tuuina atu ia Aperaaamo e avea o ‘se faamau o le amiotonu o le faatuatua lea sa ia te ia e o’o mai i le taimi na peritomeina ai o ia’ (Roma 4:11). Na manaomia ina ia tausia e le pateriaka ma i latou e tupuga mai ia te ia e fai ma faailoga e iloa ai sa latou faamaoni i le auaunaga a le Atua ma faapena ona latou vavae ese mai i tagata ifo i tupua, ma sa talia i latou e le Atua e avea ma Ana oa faapitoa.” – *Patriarchs and Prophets*, p. 138.

“O le [peritome] o se faailoga lea na iloa ai o i latou na mauaina lea faailoga, sa tuuina atu atoa i latou i le auaunaga i le Atua – o se tautinoga lea e iloa ai o le a latou faatumauiina lo latou vavae ese mai i tagata ifo i tupua, ma na talia i latou e le Atua e avea ma Ana oa faapitoa.” – *Patriarchs and Prophets*, p. 138.

“O le [peritome] o se faailoga lea e iloa ai o i latou ua mauaina lea faailoga, sa tuuina atu atoatoa i latou i le auaunaga i le Atua – o se tautinoga lea e iloa ai o le a latou faatumauiina lo latou vavae ese mai i le ifo i tupua ma o le a latou usitai i le tulafono a le Atua.” – *Ibid.*, p. 363.

c. O le a se iloa e aoga e tatau ona tatou maua i le taimi lenei ina ia mafai ai ona tatou ulufale atu i le sootaga “fou” lava lea e tasi o le feagaiga ma le Atua? Teuteronome 10:16; Kolose 2:11; Eperu 8:10; 2 Korinito 6:16, 17.

“E tatau ona tatou talitonu ua filifilia i tatou e le Atua, ina ia lavea’ia i tatou e ala i le faatinoina o le faatuatua, e ala i le alofa tunoa o Keriso ma le galuega a le Agaga Paia; ma e tatau ona tatou vivii ma faamamaluina le Atua mo lea faaaliga

ofoofogia o Lona alofa ua tatou maua e aunoa ma sa tatou mea na faia ina ia maua ai. O le alofa o le Atua lea e tosinaina atu le tagata ia Keriso, ina ia taliaina ma le alofagia, ma tuuina atu i le Tama. E ala i le galuega a le Agaga, o le sootaga faalelagi i le va o le Atua ma le tagata agasala, ua faafouina. Ua fetalai mai le Tamā: ‘O le a fai A’u ma o latou Atua, o le a fai foi i latou ma O’u tagata. O le a Ou fa’aali atu Lo’u alofa faamagalo ia i latou ma foai atu i luga ia i latou Lo’u olioli. O le a fai i latou ma oa taua mo A’u; auā o lenei nuu ua Ou foafoaina mo A’u o le a latou faailoa atu O’u viiga.’” – *The Signs of the Times*, January 2, 1893.

“O le aiaiga o le taliaina i totonu o le aiga o le Alii, o le o ese mai lea mai i le lalolagi, ma vavae ese mai i ona aafiaga leaga uma lava.” – *God’s Amazing Grace*, p. 57.

Aso Lua

Fepuari 7

3. O SE TOFIGA FAAOSITaulaga E FAavavau

a. Aisea ua fa’aigoaina ai Keriso o Ia o se faitaulaga e faapei o Mekisateko ae lē faapei o Arona? Eperu 5:5, 6; 7:11-16; Mataio 1:1, 2.

“O le faitaulaga sili na fuafuaina i se tulaga faapitoa lava ina ia faatusalia mai ai Keriso, o lē na fuafuaina o le a avea ma faitaulaga sili e faavavau e faapei o le tofiga fa’aositaulaga o Mekisateko. O lenei tofiga fa’aositaulaga e le’i mafai ona tuuina atu i se isi tagata, pe tauaveina foi e se isi tagata”. – *The SDA Bible Commentary* [E. G. White Comments], vol. 7, p. 930.

b. O le a le auala e fesootei atu ai le tofiga fa’aositaulaga o Mekisateko i le tofiga o Keriso fa’aositaulaga e faavavau, ma aisea foi e sili atu ai nai lo le tofiga fa’aositaulaga o Arona? Faatusatusa le Eperu 7:1-3 ma le Eperu 7:20-25; 6:18-20.

“O Keriso lea sa fetalai mai e ala mai ia Mekisateko, le ositaulaga a le Atua silisiliese. O Mekisateko e lē o Keriso lea, peitai o ia o le siufofoga o le Atua i totonu o le lalolagi, le sui o le Tamā.” – *Selected Messages*, bk. 1, p. 409.

“O le igoa o lenei pepe itiiti na leai sona fesoasoani . . . o le faamoemoe lea o le aiga tagata pa’ū. O le tamaitiiti lea sa totogiina i ai mo ia le tupe e toe fa’atauina

mai ai, o Ia lea na fuafuaina Na te totogiina le tau mo agasala a le lalolagi atoa. O Ia o le ‘faitaulaga moni i le aiga o le Atua,’ o le ulu Ia o ‘se tofiga fa’aositaulaga e lē ma-suia,’ o le fautua lea i ‘le itu taumatau o le Tupu mamalu oi luga’ (Eperu 10:21; 7:24; 1:3).” – *The Desire of Ages*, pp. 52, 55.

c. O le a se ata fa’afa’atusa o loo i ai i le meaai lea sa ofoina atu e le faitaulaga a le Atua ia Aperamo? Faatusatusa le Kenese 14:18-20 ma le 1 Korinito 10:16; 11:23-26.

“O le areto ma le uaina o loo faatusa mai ai le tino ma le toto o Keriso. E faapei ona tofitofiina le areto, ma sasa’a mai le uaina, na faapena foi ona tu’ia le tino o Keriso i luga o le satauro, ma o Lona toto na fa’amaligiina ina ia lavea’i ai i tatou.

“O le aina o le areto ma le inuina o le uaina, tatou te faailoa atu ai tatou te talitonu i le areto ma le uaina na tofitofiina ma faamaligiina ina ia lavea’i ai i tatou. Tatou te faailoa atu ua tatou salamo mai i a tatou agasala, ma ua tatou taliaina Keriso e avea ma o tatou Faaola.” – *The Story of Jesus*, p. 98.

Aso Lulu

Fepuari 8

4. O SE TOFI E FAAVAVAU

a. O le a le laueleele faavavau, lea na faatusa mai e le laueleele faalelalolagi na folafola atu e le Atua ia Aperamo? Kenese 17:8; Eperu 11:8-10; Faaaliga 21:2.

“O mea eseese na o’o i tagata Eperu, o se a’oga lea o le sauniuniga mo lo latou aiga folafolaina i Kanana. E finagalo le Atua i Ona tagata i aso nei ina ia latou toe suesueina i se loto agamalu ma le agaga e mafai ona a’oa’oina, tofotofoga na ui atu ai Isaraelu anamua, ina ia mafai ai ona faatonuina i latou i la latou sauniuniga mo le Kanana faalelagi.” – *Patriarchs and Prophets*, p. 293.

“Ia faamanatu mai ia i tatou e mea uma lava e matagofie i lo tatou aiga faalelalolagi nei, le vai tioata manino ma laufanua lanu meamata, o laau felueluea’i ma mauga ola, o le aai pupula ma le au pepese ofu papa’e o lo tatou aiga faalelagi –

lena lalolagi matagofie e lē mafai ona fa'aatina mai e se tagata tusi ata, e lē mafai foi ona faamatalaina e se laulaufaiva o se tagata.” – *The Faith I Live By*, p. 279.

b. O afea ma o le a faapefea ona maua e Aperamo ma lana fanau lo latou tofi e faavavau? Mataio 25:31, 34; Ioane 14:1-3, Tanielu 7:27.

“O le fogaeleele malepelepe lē laugatasi, o lenei ua foliga mai o se laueleele laugatasi mafolafola. O le iunivesa atoa lava a le Atua ua mamā atoa, ma o le finauga tele ua faamutalia e faavavau. Soo se mea lava na tatou vaai atu i ai, o mea uma lava na vaai atu i ai, na matagofie ma paia. Ma o le au uma o le au faaolaina, o ē matutua ma ē laiti, ta'uta'ua ma ē faatauvaa, na latou lafoina atu o latou palealii fe'ilafi i aao o lo latou Faaola, ma ifo toele atu i lo latou alofa naunauta'i i Ona luma, ma latou ifo atu ia te Ia o Lē soifua e faavavau faavavau lava. O le laueleele fou matagofie, ma lona mamalu matagofie uma, o le tofi lea e faavavau o le au paia. O le malo ma le pule, ma le mamalu o le malo i lalo o le lagi uma, na tuuina atu i le taimi lena i le au paia a Lē Silisiliese, o le a fai mo i latou e faavavau, e faavavau faavavau lava.” – *Early Writings*, p. 295.

“O le faamausaliina atoa o le malo o Lona mamalu o le a lē faataunuuina seivagana ua o'o i le afio faalua mai o Keriso i le lalolagi lenei. ‘O le malo ma le pule, ma le mamalu o le malo i lalo o le lagi atoa,’ e tatau ona foa'iina atu i ‘tagata o le au paia a Lē Silisiliese’ (Tanielu 7:27). O le a fai mo i latou le malo na saunia ‘talū mai le faavaeina o le lalolagi’ (Mataio 25:34). Ma o le a avatu e Keriso ia te Ia lava lona lava mana tele ma o le a Ia nofo tupu loa.” – *Thoughts From the Mount of Blessing*, p. 108.

Aso Tofi

Fepuari 9

5. OLA E FAAVAVAU

a. O le a le folafolaga silisili lava i folafolaga uma ua foa'iina mai e ala mai i le feagaiga e faavavau? Kalatia 3:29; 1 Ioane 5:11; Faaaliga 21:3, 4.

“O loo sau le aso o le a mae’a ai ona tauina le taua, ma ua maua le manumalo. O le finagalo o le Atua o le a faia i le lalolagi e faapei ona faia i le lagi. O malo o le au faaolaina o le a latou le iloa se isi lava tulafono ae na o le tulafono lava a le lagi. O tagata uma o le a avea o se aiga fiafia, tuufaatasia, ua fa’aofuina i ofu o le viiga ma le faafetai – o le ofu talaloa lea o le amiotonu a Keriso.” – *The Ministry of Healing*, p. 506.

“[I le lagi], e lē i ai se loto lē faamalieina, poo se faanoanoa, poo se agasala, e leai se isi o le a fai mai, ‘Ua ou ma’i.’ O iina, e lē i ai ni solo o falelauasiga, leai se auē, leai se oti, leai ni tete’aga, leai ni loto momomo; ma e i ai iina Iesu, e i ai iina ma le filemu. . . . E i ai le tumu atoatoa o le olioli i le mea e i ai o Ia, o lona itu taumatau o loo i ai fiafiaga e faavavau faavavau lava!” – *My Life Today*, p. 349.

b. O le a le faamoemoe e lē tatau ona tatou lafoa’ia? Tito 2:11-13; Eperu 10:35-37.

“Onosa’i, fitafita kerisiano. E toeitiiti lava, ona maliu mai ai lea o Lē o le a maliu mai. O le po o le faatalitali ma le vaivai, ma le mataala, ma le faanoanoa ua toeitiiti lava a muta. O le tau e lē o toe umi ae foaiina mai loa; o le aso faavavau o le a malama mai. E leai se taimi e toe moe ai i le taimi lenei – leai se taimi e toe tuinanau saoloto ai i mea lē aoga e toe faanoanoa ai. O le tagata e lē fefe e toe moe i le taimi lenei, o le a ia misia avanoa sili ona taua o le faia o mea lelei. . . . O agaga taitasi uma lava e lavea’ia o le a avea ma fetu faaopoopo i le pale o Iesu, lo tatou Faaola pele.” – *Christian Service*, p. 275.

Aso Faraile

Fepuari 10

FESILI TOE FAAMANATU

1. E faapefea ona mafai ona tatou maua le mautinoaga i le Upu a le Atua?
2. E faapefea ona mafai ona tatou maua le sootaga lava lea e tasi o le feagaiga ma le Atua lea sa iā Aperamo?
3. Faamatala pe faapefea ona mafai ona tatou maua le mautinoaga i le tofiga fa’aositaulaga e faavavau o Keriso.
4. O le a le faamoemoega e manuia ai o fanau a Aperamo?
5. Aisea e avea ai le ola e faavavau faatasi ma le Atua o le faamoemoe e manuia ai, o le kerisiano?

O le Alofa Tunoa e Faavavau

“Auā ua lavea’iina outou e le alofa tunoa e ala i le faatuatua; e lē ona o outou: a’o le meaalofa a le Atua” (Efeso 2:8).

“O le alofa tunoa, o lona uiga o le agalelei lea e faia i lē e lē tatau i ai, i lē ua leiloa. Talu ai ona o le mea moni o i tatou o tagata agasala, e aunoa ma le tulia ese o i tatou mai i le alofa tunoa ma le alofa o le Atua, o lea ua faia ai le faatinoina o Lona alofa ia i tatou o se mea lelei e manaomia ina ia mafai ai ona lavea’iina i tatou.” – *Selected Messages*, bk. 1, p. 347.

Faitauga Fautuaina: *Patriarchs and Prophets*, pp. 363-373;
Faith and Works, pp. 15-28.

Ulua’i Aso

Fepuari 12

1. O LE FEAGAIGA FOU O LE FOLAFOLAGA

a. O le a le auala na faia ai e le Atua le feagaiga fou ma Aperamo - ma o le a le mea na faia mulimuli ane e le Atua ina ia faamautuina ai lenei feagaiga ma aisea foi? Kalatia 3:14-18; Eperu 6:13-18.

b. O le a se mea na faia e Aperamo lava ia e ta’uaogaina ai o ia i nei faamanuiaga o le feagaiga – ma o le a se mea e a’oa’o mai e lea tulaga ia i tatou e faatatau i le finagalo o le Atua i tagata agasala? Kenese 12:1-3; 1 Korinito 1:26-31; Roma 3:10-12.

“O le alofa tunoa o se uiga lea o le Atua e alofa mai ai i tagata e lē aoga i ai lona alofa. Tatou te lē’i saili mo lenei alofa tunoa, peitai na auina mai e saili mai

mo i tatou. E olioli le Atua e foai mai Lona alofa tunoa i luga ia i tatou, e lē ona faapea e ta'uaogaina i ai i tatou, peitai ona o lo tatou matua lē aoga lava. . . .

“O le mamalu o le [Atua] le faamagaloina o le tagata sili ona agasala.” – *The Ministry of Healing*, p. 161.

“O le sili atu o le lē aoga o le tagata o loo mauaina le alofa tunoa o le Atua, o le sili atu foi lena o le mamalu o le alofa tunoa o le Atua.” – *General Conference Daily Bulletin*, January 28, 1893.

Aso Gafua

Fepuari 13

2. O LE FEAGAIGA TUAI O GALUEGA

a. Aisea na faia ai e le Atua se isi feagaiga e ala mai ia Mose i le 430 tausaga mulimuli ane - ma aisea e lē mafai ai e le feagaiga lea ona faalēaogaina le feagaiga fou o le folafolaga? Teuteronome 4:12, 13; Esoto 19:5-7; Kalatia 3:17; 1 Peteru 1:18-20.

“I le nofo pologa o tagata [o Isaraelu], na matua leiloa lava mai ia i latou le iloa e faatatau i le Atua ma tapulaa o le feagaiga faa-Aperaamo. . . . Na saili le Atua ina ia fa'aali atu ia i latou Lona mana ma Lona alofa tunoa, ina ia mafai ai ona ta'ita'ia i latou ina ia alolofa ma talitonu faalagolago ia te Ia . . . ina ia latou iloa ai le matua leai o so latou fesoasoani, ma lo latou manaomia o le fesoasoani faalelagi; ma na Ia galuea'iina loa le fa'aolataga mo i latou. . . .

“O lo latou nonofo i le lotolotoi o le ifo i tupua ma le amio leaga lē faamaoni, na leai ai so latou iloa moni e faatatau i le paia tele o le Atua, ma le matua agasala tele o ō latou lava loto, o le matua leai o so latou malosī, i totonu ia i latou lava, e usitai atu ai i le tulafono a le Atua, ma lo latou manaomia o se Faaola. O mea uma lava nei e tataua ona a'oa'oina ai i latou.” – *Patriarchs and Prophets*, pp. 371, 372.

“O le feagaiga 'tuai – na faia i le va o le Atua ma Isaraelu i Sinai, ma na fa'amausaliina i le taimi lena e le toto o se manu na fasia. O le feagaiga fa'a-Aperaamo na fa'amausaliina e le toto o Keriso, ma o loo fa'aigoaina o le feagaiga 'lona lua', poo le feagaiga 'fou', auā o le toto lea na fa'amaufaaailogaina ai, na fa'amaligiina ina ua mavae le toto o le feagaiga muamua.” – *Ibid.*, p. 371.

b. O le a le tali a le nuu i manaoga o le Atua i lalo o le feagaiga tuai? Esoto 19:8. E faapefea ona ono mafai ona tatou pa'u'ū atu i le lamatiaga lava lea e tasi?

“O le nuu latou te le'i iloa le agasala tele o ō latou lava loto, ma a aunoa ma Keriso, na matua lē mafai lava e i latou ona latou tausia le tulafono a le Atua.” – Ibid, pp. 371.

“O i latou e lē lagonaina lo latou manaomia o le toto o Keriso, o ē o loo manatu e mafai ona latou faamausaliina le fiafia mai o le Atua ia i latou e ala i a latou lava galuega e aunoa ma le alofa tunoa fa'alelagi, o loo latou faia le mea sese lava lea e tasi na faia e Kaino. Afai latou te lē taliaina le toto e fa'amamāina ai, ua latou i ai la i lalo o le faasalaga faalelagi.” – Ibid., p. 73.

“O le ta'uamiotonuina e le tagata o ia lava, o le lamatiaga lea o lenei tupulaga; e vavaeeseina ai le loto mai ia Keriso. O i latou e faalagolago i la latou lava amiotonu, e lē mafai ona latou malamalama i le auala e o'o mai ai le faaolataga e ala mai ia Keriso. Latou te fa'aigoaina le agasala o le amiotonu ma latou fa'aigoaina le amiotonu o le agasala. Latou te lē fa'atāuaina le leaga tele o le soli tulafono, leai so latou malamalamaaga e faatatau i le mata'utia tele o le tulafono; auā latou te lē amanaiaina le tapula'a o le amio, a le Atua. – *Faith and Works*, p. 96.

Aso Lua

Fepuari 14

3. MAI I LE FEAGAIGA TUAI AGA'I ATU I LE FEAGAIGA FOU

a. O le a le sini o le tulafono o le amio i le feagaiga tuai ma o le a lona sini o loo auauna ai pea i le taimi lenei? Roma 7:7, 9-13, 20; 3:19-20.

“O le tulafono na foaiina mai ina ia latou iloa ai le agasala, ma fa'aalia ai lo latou manaomia o se Faaola.” – *The Desire of Ages*, p. 308.

b. I le feagaiga fou, e fa'aapefea ona suia e le Atua o tatou manatu e faatatau i Lana tulafono ma o le a le suiga o le a vaaia i o tatou olaga? Eperu 8:10; Salamo 40:8; Esekielu 36:26, 27; Kolose 3:9, 10.

“O le tulafono lava lea na vaneina i papa ma’a, ua tusia foi e le Agaga Paia i papa aano o le loto. E aunoa ma lo tatou feoa’i solo e faatu la tatou lava amiotonu, tatou te taliaina le amiotonu a Keriso. O lona toto e togiola a’i mo a tatou agasala. O lona usitai e taliaina mo i tatou. O le loto la ua fa’afouina e le Agaga Paia, o le a ia fuaina mai ‘fua o le agaga.’ E ala i le alofa tunoa o Keriso, o le a tatou ola ai i le usitai i le tulafono a le Atua ua tusia i o tatou loto.” – *Patriarchs and Prophets*, p. 372.

“O le suiga i totonu o loto fa’aletagata, o le liuaga o amio fa’ale-tagata, o se vavega lea e fa’aalia ai se Faaola soifua e faavavau, o loo galue e lavea’i agaga.” – *The Desire of Ages*, p. 407.

c. E faapefea ona fa’ataunuu atoatoa e le olaga o le feagaiga fou, le agaga ma le auga o le tulafono – ma o le a se mea na fetalaia mai e faatatau ia Aperamo e faatatau i lenei tulaga? Mataio 5:20-22, 27, 28, 31-48; Roma 13:8-10; Kenese 26:5.

“O le usitai e lē o se gaua’i lea i le vaaiga i fafo, ae o le auaunaga lea o le alofa. O le tulafono a le Atua o se fa’aaliga lea o Lona natura tonu lava; o le tino lea o le tapulaa tele lava o le alofa, ma o le mafuaaga lea e avea ai ma fa’avae o Lona malo i le lagi ma le lalolagi. Afai e fa’afouina o tatou loto i le fa’atusa o le Atua, afai e totōina le alofa fa’alelagi i totonu o le loto, o le a lē tauaveina ea le tulafono a le Atua i le olaga? A totōina loa le tapulaa o le alofa i totonu o le loto, a toe fa’afouina loa le tagata ia faapei o le faatusa o Lē na foafoaina o ia, ua fa’ataunuuina loa le folafolaga o le feagaiga-fou, ‘O le a Ou tuuina A’u tulafono i totonu o ō latou loto, o le a Ou tusia foi A’u tulafono i o latou mafaufau’ (Eperu 10:16). Ma afai e tusia le tulafono i totonu o le loto, o le a lē fausiaina ai ea le olaga?” – *Steps to Christ*, p. 60.

Aso Lulu

Fepuari 14

4. E LE ALOFA TUNOA E ALA I LE FAATUATUA

a. O le a le meaalofa na ofofua mai e le Atua ia Aperamo auā na ia filifili e talitonu? Roma 4:22; Kalatia 3:6.

“O le manatu faapea o le amiotonu a Keriso ua foaiina mai ia i tatou, e lē ona o soo se mea lelei lava na tatou faia, peitai o se meaalofo foai fua mai lea mai i le Atua, o se manatu tāua fa’apelepeleina tele lea. O le fili o le Atua ma le tagata e lē o manao ina ia faailoa manino atu lenei upu moni; auā na te iloa, afai e talia atoatoa lenei upu moni e tagata, o le a talepeina ai lona mana.” – *Gospel Workers*, p. 161.

“O le alofa tunoa o Keriso e tatau ona ta’uamiotonu sa’oloto ai le tagata agasala e aunoa ma sana amiotonu poo sana fa’aupuga o sana lava amiotonu. O le ta’uamiotonuina o le faamagaloga atoatoa lea o le agasala. O le taimi lava e talia ai Keriso e le tagata agasala e ala i le faatuatua, o le taimi foi lena e faamagaloina ai o ia. O le amiotonu a Keriso e foaiina mai ia te ia, ma e lē tatau ona ia toe masalosalo i le alofa tunoa fa’amagalo o le Atua.” – *The Faith I Live By*, p. 107.

b. O le a le mea na faia e Aperamo ua ta’uamiotonuina ai o ia – ma o le a le auala e tasi e faapena ona mafai ona lavea’iina ai tagata talitonu? Roma 4:1-5; Efeso 2:8, 9.

“O le taliaina o i tatou e le Atua, e na o Lona Alo pele lava e mautinoa ai, ma o galuega lelei ua na o le iuga lea o le galuega a Lona alofa fa’amagalo sala. E lē o ni viiga ia iā i tatou, ma e leai ma se mea e foaiina mai ia i tatou mo a tatou galuega lelei ia atonu e mafai ona tatou manatu tatou te maua ai se vaega i le faaolataga o ō tatou agaga. O le faaolataga o le meaalofo foaifuaina mai lea a le Atua i le tagata talitonu, ma e na o Keriso lava ua mafua ai ona foaiina mai ia te ia.” – *The SDA Bible Commentary* [E. G. White Comments], vol. 5, p. 1122.

c. E ui lava o le faatuatua o se meaalofo foi lea (vaai i le Roma 12:3 (vaega mulimuli), o le a le mea e tatau ona tatou faia i le faatuatua? Ioane 3:16; Luka 7:1-9; Roma 10:17.

“O le faatuatua lea e mafai ai e i tatou ona maua meaalofo a le Atua, o le meaalofo foi lea, o se vaega o le faatuatua lea ua foaiina mai i tagata uma. E tupu a’e a’o faatinoina i le fa’aaogaina o le upu a le Atua. O le auala e faamalosia ai le faatuatua, e tatau ona masani ona tatou aumaia ia fesootai ma le upu.” – *Education*, pp. 253, 254.

“O alii ma tamaitai o le a lē laveaia i latou seivagana ua latou faatinoina le faatuatua, ma latou fausia i luga o le faavae moni, seivagana ua latou faatagaina le

Atua Na te toe foafoaina i latou e Lona Agaga Paia.” – *The Signs of the Times*, February 14, 1900.

Aso Tofi

Fepuari 15

5. AGALELEI E LE’I I AI SE GALUEGA LELEI NA FAIA INA IA MAUA AI

a. O le a se agalelei e le’i i ai sa tatou amio lelei na faia ina ia tatou maua ai, lea na folafolaina mai i lalo o le feagaiga fou, ma ua faailoa mai e le Atua ina ia lavea’iina ai le aiga tagata? Kenese 12:3; 1 Ioane 4:14; Efeso 2:4-8; Roma 5:15-18.

“E ui lava ona o lo tatou lē usitai ua tatou faatupuina ai le toasa mai o le Atua ma Lana tu’ua’iga, ae Na te le’i lafoaia i tatou.” – *God’s Amazing Grace*, p. 10.

“O i latou e ulufale atu i le lagi o le a latou lē fuaina ona puipui e ala i la latou lava amiotonu, o le a lē tatalaina atu foi ona faitotoa ia i latou mo taulaga tetele o auro ma siliva, peitai o le a faatagaina i latou e ulufale atu i maota e tele o le fale o le Tamā e ala atu i le amiotonu o le maliu o Keriso.” – *Ibid*, p. 179.

b. E faapefea ona maua e se tagata agasala lea meaalofo ofofuaina mai o le faaolataga e ala mai ia Iesu Keriso? Ioane 1:12; Roma 5:17; Eperu 11:8.

“O i latou uma lava e talitonu o Keriso o Ia lea na maliu e togiolaina a’i, e mafai ona latou o mai ma latou maua le faamagaloga mo a latou agasala; auā e ala atu i le amiotonu a Keriso, o lea ua tatalaina ai le sootaga i le va o le Atua ma le tagata. E mafai e le Atua ona taliaina a’u e avea ma Ona atalii poo Sona afafine, ma e mafai ona avea o Ia mo a’u ma ou olioli ai i totonu ia te Ia e avea ma o’u Tamā alofa. E tatau ona tatou fa’aogatotonuina o tatou faamoemoega mo le lagi ia Keriso ia na o Ia lava, auā o Ia o lo tatou sui ma lo tatou Faaola mautinoa.” – *Selected Messages*, bk. 1, p. 363.

c. O a mea e lua na faaumatia e le Atua e ala i Lona alofa tunoa ofoofogia? Roma 8:2; 1 Ioane 3:5, 8; 2 Timoteo 1:10.

FESILI TOE FAAMANATU

1. Faamatala le upu “folafolaga” i lo tatou iloaina o le Atua e matuā lē mafai lava ona pepelo o Ia.
2. Aisea na tuuina mai ai le feagaiga tuai – ma aisea na le’i i ai ai se faatuatua?
3. E faapefea ona tusia e le Atua Lana tulafono o le alofa i totonu o ō tatou loto ma o tatou mafaufau?
4. Aisea e lē mafai ai ona tatou avea mo i tatou le viiga mo a tatou galuega lelei i le faaolataga?
5. Aisea o le a lē mafai ai lava ona tatou gugutu e faatatau i lo tatou faatuatua?

Lesona 8

Sapati, Fepuari 25, 2017

O se Faatuatua e Galue

“E le’i ta’uamiotonuina ea Aperamo lo tatou tamā i galuega, ina ua ia ofoina atu Isaako lona atalii i luga o le fata faitaulaga?” – (Iakopo 2:21).

“O loo to’atele e lē o malamalama i le sootaga a le faatuatua ma galuega. Latou te fai mai, ‘E na o le talitonu lava ia Keriso, ma ua ē saogalemu. E leai sau mea e faia i le tausiiaina o le tulafono.’ Peitai o le faatuatua moni o le a fa’aalia i le usitai.” – *Patriarchs and Prophets*, pp. 153, 154.

Faitauga Fautuaina: *Faith and Works*, pp. 47-54, 111-116.

Ulua’i Aso

Fepuari 19

1. O SE FAATUATUA GALUE

- a. **E faapefea ona tatou iloa na talitonu Aperamo i le upu a le Atua? Kenese 22:1-5; Iakopo 2:21-24.**

“Na talitonu Aperamo i le Atua. E faapefea ona tatou iloa na talitonu o ia? O ana galuega na molimau i le uiga o lona faatuatua, ma o lona faatuatua na avea ma amiotonu ia te ia.” – *Reflecting Christ*, p. 79.

b. O le a le sootaga i le va o le faatuatua ma galuega? Iakopo 2:17, 18; Mataio 7:16-20. O a ituaiga fua e tatau ona fuaina mai e le kerisiano?

“O galuega lelei e lē mafai ona faatauina ai le faaolataga, peitai o ni faamaoniga ia o le faatuatua lea e galuea’iina e le alofa ma fa’amamāina ai le agaga.” – *The Desire of Ages*, p. 314.

“E pei lava o le laau lelei o le a ia fuaina mai fua lelei, o le a faapena foi ona fua mai e le laau ua totona moni i totonu o le faatoaga a le Alii, fua lelei e o’o atu ai i le ola e faavavau. O agasala e faavaivaia ai, ua faatoilaloina; o manatu leaga ua lē faatagaina i totonu o le mafaufau; o masaniga leaga ua fufulueseina mai i le malumalu o le loto. . . . O se liuaga atoa lava ua faia.” – *The SDA Bible Commentary* [E. G. White Comments], vol. 6, p. 1080.

Aso Gafua

Fepuari 20

2. O GALUEGA A LE ATUA

a. Na faapefea ona fa’aalia e Aperamo lona faatuatua i le Atua? A’o ia faatinoina lona faatuatua, o le a le mea na ia fa’aalia e faatatau i lona faatuatua? Iakopo 2:22; Kenese 22:12.

“O le faatuatua e galue i le alofa ma fa’amamāina ai le agaga. O le faatuatua e tatupu mai ma fuga mai ma fuaina mai se seleselega o fua tāua tele. O le mea e i ai le faatuatua, e fa’aalia ai foi galuega lelei.” – *Selected Messages*, bk. 1, p. 398.

b. O fea e sau ai galuega lelei? Faatusatusa le Ieremia 17:9; Roma 3:12 ma le Efeso 2:10; Tito 2:13, 14.

“O le faatuatua moni, o le a fa’aalia i galuega lelei; auā o galuega lelei o fua ia o le faatuatua. A’o galue le Atua i totonu o le loto, ma ua gaua’i atu e le tagata lona loto i le Atua ma ia galue faatasi ma le Atua, na te galuea’iina mai ai i fafo i lona olaga le mea lea e galuea’iina e le Atua i totonu e ala i le Agaga Paia, ma ua i ai le loto gatasi i le va o le sini a le loto ma le faatinoga a le olaga. O agasala taitasi uma lava e tatau ona lafoaia ona o le mea inosia lea na faasatauroina ai le Alii o le ola ma le mamalu, ma o le tagata agasala e tatau ona i ai sona olaga aga’iga’i i luma e ala i lona faia i taimi uma lava o galuega a Keriso. O le gaua’i atu o le loto i taimi uma lava, o le usitai i taimi uma lava, e faatumauiina ai le faamanuiaga o le ta’uamiotonuina.” – Ibid., p. 397.

“Afai tatou te faamaoni i le faia o la tatou vaega, i lo tatou galulue faatasi ma Ia, o le a galuea’iina e le Atua e ala atu ia i tatou Lona lava finagalo fiafia. Peitai e lē mafai ona galue le Atua e ala atu ia i tatou pe afai tatou te lē faia se taumafaiga. Afai tatou te maua le ola e faavavau, e tatau ona tatou galulue, ma galulue finafinau lava. . . . E tatau ona tatou mulimuli i le faataitaiga ua tuua mai e Keriso ia i tatou, ma gaua’i atu ia te Ia i mea uma lava. O le malosi fai filifiliga o ō tatou loto, e tatau ona loto gatasi ma Lona finagalo.” – *The Review and Herald*, June 11, 1901.

c. A’o le’i mafai ona aumaia e le kerisiano galuega lelei a le Atua, o le a le mea e tatau ona tupu muamua? Efeso 2:1-5; Kalatia 2:20; Ieremia 29:13.

“E tasi lava le auala e mafai ai ona tatou faamausaliina le fesoasoani a le Atua, o le tuu atu atoa lava lea o i tatou uma i Ona aao ma talitonu ia te Ia Na te galue mo i tatou. A’o tatou taofi mau atu ia te Ia e ala i le faatuatua, Na te faia le galuega. O le tagata talitonu e na o le talitonu faalagolago lava e mafai ona ia faia. A’o galue le Atua, e mafai foi ona tatou galulue, ma talitonu faalagolago atu ia te Ia ma faia Lona finagalo.” – *The SDA Bible Commentary* [E.G. White Comments], vol. 6, p. 1080.

Aso Lua

Fepuari 21

3. O SE TALITONUGA MATE

a. O le a le eseese i le va o le faatuatua ola ma se talitonuga mate? Iakopo 2:19, 20; Mareko 7:6, 7.

“O le faatuatua moni, lea e faalagolago atoa lava i le Atua, o le a fa’aalia i le usitai i manaoga uma lava o le Atua. . . . I augā-tupulaga uma lava sa i ai lava i latou na latou fai mai e i ai sa latou aiā i le alofa o le Atua i le taimi lava lea na latou lē amanaiaina ai nisi o Ana poloaiga. Peitai o le Tusi Paia o loo fai mai, o galuega e ‘fa’aatoatoaina ai le faatuatua’; ma, a aunoa ma galuega o le usitai, o le faatuatua la ‘e mate’ (Iakopo 2:22, 17).” – *The Faith I Live By*, p. 91.

“E toatele tagata o loo faamalieina i auaunaga o faaupuga o laugutu, ae e matuā toaitiiti lava o loo i ai so latou lagona alofa naunau moni mo le Atua.” – *Testimonies*, vol. 4, p. 534.

b. E mafai ea e se tagata o loo i ai se talitonuga mate ona ia faia galuega lelei? Mataio 23:27, 28; 7:21-23.

“O le tagata lelei, mai i le oa lelei o lona loto, na te aumaia ai mea lelei. Aisea? Auā o Keriso o le mana lea o loo tumau i totonu o le loto. O le upu moni e faapaiaina ai, o se fale-oa lea o le poto ia i latou uma lava e faatinoina le upu moni. E faapei o se vaipuna ola, o loo puna a’e i le ola e faavavau. O le tagata e lē o afio tumau Keriso i totonu o lona loto, o le a ia tautala saoloto i talanoaga taugofie, o faaupuga soona fai, lea e agasala ai. O le laulaufaiva na te tautala i mea leaga, o tautalatalaga masani maulalo, o faamatalaga maulalo masani, o le laulaufaiva lena e manaomia ina ia togafitia i malala ola o le ratami.” – *Mind, Character, and Personality*, vol. 2, p. 577.

“E leai se tagata e mafai ona ia maua le agaga ma le mafaufau o Keriso e aunoa ma le faaleleia atili o ia e le agaga ma le mafaufau o Keriso i sootaga uma lava ma tiute o le olaga. O muimuiga, faitioga, ma le ita lē onosai, e lē o fua ia o tapulaa lelei.” – *Testimonies*, vol. 4, p. 347.

c. O le a se mea o le a lē i ai lava i taimi uma i galuega a se tagata oti talitonu? 1 Ioane 4:20, 21; Ioane 8:37-41.

“O le usitai i le upu e fua mai ai fua o le uiga lelei o loo manaomia – ‘o le alofa lē faafoliga lea i le au uso’ (1 Peteru 1:22). O lenei alofa e fanau mai i le lagi ma e ta’ita’ia atu ai i sini maualuga ma gaioiga lē faapito.” – *The Acts of the Apostles*, p. 520.

4. O LE A'A POO LE FUA?

a. O le a le mea e tupu pe a avea galuega lelei o le usitai ma a'a o le olaga faakerisiano a ua lē avea ma fua o le olaga faakerisiano? Mataio 23:5.

“O Faresaio na latou sailia lo latou mamalu i a latou sauniga faautauta ma lo latou tautu finafinau i la latou tapuaiga ma a latou fesoasoani. Na latou faailoa mai lo latou vilivilitai mo tapuaiga e ala i lo latou faia lea ma autu o talanoaga. O finauga i le va o talitonuga feteenai na matua leo tetele ma umi, ma e lē o se mea fou foi le faalogoina i auala, o le leo o finauga ita mai i faia'oga popoto o le tulafono.

“Na matuā ese mai lava i nei mea uma, le soifuaga o Iesu. I lena olaga, e le'i i ai ni finauga pisapisaō, leai ni tapuaiga faalialiavale, leai ni gaioiga ina ia maua mai ai le viiga, na faapea ona molimauina. O Keriso sa natia i totonu o le Atua, ma o le Atua na fa'aalia i le amio a Lona Alo.” – *The Ministry of Healing*, p. 32.

b. O le a se mea e tatau ona i ai i le a'a o le olaga o le kerisiano i taimi uma lava? Kalatia 6:14.

“O agelu latou te tuuina atu le viiga ma le mamalu ia Keriso, auā e lē o saogalemu foi i latou seivagana ua latou vaavaai i puapuaga o le Alo o le Atua. . . . A aunoa ma le satauro o le a lē sili atu lo latou saogalemu mai i le agasala nai lo agelu a'o le'i pa'ū Satani. . . . O i latou uma lava e mana'ona'o mo le saogalemu i le lalolagi poo le lagi, e tatau ona latou vaavaai i le Tama'i Mamoe a le Atua. . . .

“Afai o le a manatunatu tagata i le alofa o Keriso, lea na faaalua mai i le satauro, o le a faamalositia lo latou faatuatua ina ia latou faaaogaina mo i latou le amiotonu a Lona toto na fa'amaligiina, ma o le a faamamāina i latou ma lavea'iina mai i le agasala.” – *The SDA Bible Commentary* [E. G. White Comments], vol. 5, pp. 1132, 1133.

c. O le a le manatu o le a i ai i le kerisiano moni e faatatau i ana lava galuega i lona iloaina o galuega a Keriso? Filipi 3:4-9; Isaia 6:5.

“O le sili atu o le vaai o so’o o le Atua i le amio a Keriso, o le sili atu foi lena o le agamalu o le a latou maua, o le sili ifo foi lena o le maulalo o ̄ latou manatu e faatatau ia i latou lava. . . . Ua galo ia i latou i latou lava i lo latou iloaina o lo latou lava lē aoga, ma le mamalu ofoofogia o le Atua.” – *That I May Know Him*, p. 122.

Aso Tofi

Fepuari 23

5. KERISIANO E FUA TELE MAI

a. Aisea e finagalo ai le Atua e faatumu le olaga o le kerisiano i galuega lelei e fanau mai i se loto ua suia? Mataio 5:14-16; 1 Peteru 2:9.

“O le fuafuaga a le [Atua], o tagata uma lava ua tofusua i le faaolataga tele, e tataua ona avea ma misionare mo Ia. O le amio lelei a le kerisiano e fausia ai le tapulaa e fuaina ai e tagata faalelailolagi le tala lelei. O tofotofoga e tauaveina ma le onosai, o faamanuiaga e taliaina ma le agaga faafetai, o le agamalu, agalelei, alofa tunoa, ma le alofa lea e fai ma masani le fa’aaliaina, o malamalama ia e susulu atu i le amio i luma o le lalolagi, ma fa’aalia ai le eseese ma le pogisa lea e sau mai i le uiga faapito o le loto faalenatura.” – *Patriarchs and Prophets*, p. 134.

“A fa’aalia loa le alofa tunoa o Keriso i upu ma galuega a tagata talitonu, o le a susulu atu loa le malamalama ia i latou o loo i le pogisa; auā a’o tautala atu laugutu i viiga o le Atua, o le lima o le a faaloaloa atu i agalelei foai mo le fesoasoani mo ē o le a fano.” – *Sons and Daughters of God*, p. 276.

b. I le talaaga atoa, o le a le iloa e i ai ia Keriso i taimi uma lava e faatatau i Lana ekalesia? Faaaliga 2:2, 9, 13, 19; 3:1, 8, 15. Aisea o loo naunau tele ai Iesu i galuega a Ona so’o? Iakopo 2:21, 22, 24; Faaaliga 22:12.

“O mata o le lalolagi o loo i luga ia i tatou, ma o loo mata’ituina mai i tatou e le toatele o tagata ia tatou te lē o iloa. O loo i ai i latou o loo latou iloa se mea e faatatau i mataupu ia o loo tatou fai mai tatou te talitonu i ai, ma o loo latou maitauina le aafiaga o lo tatou faatuatua i a tatou amio.” – *Selected Messages*, bk. 2, p. 386.

“O le lalolagi i le taimi lenei ua matua alaga mai i lona manaomia o se fa’aaliga o Keriso Iesu i totonu o Lana au paia.” – *In Heavenly Places*, p. 313.

Aso Faraile

Fepuari 24

FESILI TOE FAAMANATU

1. Aisea e galue ai i taimi uma lava le faatuatua moni?
2. E faapefea ona mafai ona tatou faamautinoaina o a tatou galuega e aumai i le Atua i taimi uma lava?
3. Aisea e lē mafai ai lava e se loto e lē’i liua ona ia maua ma faailoa mai le alofa lē faapito?
4. Faamatala le eseese i le va o le a’a ma le fua o ō tatou olaga ma lo tatou iloa.
5. O le a le mea o loo faatali le Atua ma le lalolagi latou te vaai i ai i totonu o le ekalesia kerisiano?

Lesona 9

Sapati, Mati 4, 2017

O le Faaola o Aperamo

“O Aperamo lo outou Tamā, na matuā olioli o ia ina ua iloa e ia lo’u aso: ma na ia vaai i ai, ma fiafia ai” (Ioane 8:56).

“E ala mai i faatusa ma folafolaga, na ‘fetalaia muamua mai ai e le Atua le tala lelei ia Aperamo’ (Kalatia 3:8). Ma o le faatuatua o le pateriaka na taula’i atu i le Faaola o le a afio mai.” – *Patriarchs and Prophets*, p. 154.

Faitauga Fautuaina: *The Desire of Ages*, pp. 752-760, 785-787.

Ulua’i Aso

Fepuari 26

1. O SE FAATUSA O KERISO

a. O ai na faatusa mai e Isaako? Kenese 22:7-9; Eperu 11:17-19.

“O Isaako na faatusalia mai ai le Alo o le Atua, o Lē na ofoina mai e avea ma taulaga mo agasala a le lalolagi. Na finagalo le Atua ina ia matua faailoa mai le tala lelei o le faaolataga i le tagata. O le auala e faia ai lenei faaolataga, ma faia ai le upu moni o se mea moni ia te ia ma ia tofotofoina ai foi lona faatuatua, na Ia manaomia Aperamo na te fasiotia lona atalii pele o Isaako. O le faanoanoa ma le tiga atoa na onosaia e Aperamo i lena tofotofoga pogisa ma le matautia, na fuafuaina mo le faailoaina loloto i lona malamalamaaga, le fuafuaga o le faaolataga mo le tagata pa’ū. Na faia o ia ina ‘ia ia malamalama, i mea na tutupu i lona lava olaga, i le tulaga lē mafaamatalaina o le faafitia e le Atua-lē-mafuatia o Ia lava i le foa’iina mai o Lona lava Alo ina ia maliu e lavea’iina ai le tagata mai i le faafanoga atoa lava.” – *Testimonies*, vol. 3, p. 369.

b. Na faapefea ona faaalia e le Atua ia Aperamo le aso o Keriso? Kenese 22:13; Ioane 1:29; Isaia 53:7.

“O Aperamo. . . na faailoaina atu ia te ia faapea, i le foa’iina mai e le Atua o Lona Alo e toatasi e lavea’i i tagata agasala mai i le faafanoga e faavavau, na faia ai e le Atua se taulaga sili atu lona telē ma sili atu lona ofoofogia nai lo se isi lava taulaga e mafai ona faia e le tagata.” – *The Desire of Ages*, p. 469.

Aso Gafua

Fepuari 27

2. O LE TAULAGA SILISILI LAVA

a. Faamatala pe na faapefea ona taumafai le Atua e fa’aali atu ia Aperamo le loloto o le taulaga silisili na Ia faia i le foa’iina mai o Lona Alo e to’atasi. Kenese 22:11, 12, 16; 1 Ioane 4:9, 10.

“O lo tatou Tama oi le lagi na Ia gaua’iina mai Lona Alo pele i tiga o le faasatauroga. O lekeona o agelu na latou molimauina le faalumaina ma le tiga o le finagalo o le Alo o le Atua peitai e le’i faatagaina i latou e lavea’i e pei ona faia ia Isaako. E leai se leo na faalogoina ina ia taofia le faasatauroina o Ia. O le Alo pele o

le Atua, le Faaola o le lalolagi, na faifaia ma inosia, na tauemua, amusia, ma sauāina, seia o’o ina ifo ifo Lona ao i le maliu. O le a se faamaoniga e sili atu e mafai ona tuuina mai ia i tatou e le Atua lē mafuatia e faatatau i Lona alofa ma Lona mutimutivale faaleatua?” – *That I May Know Him*, p. 20.

“O le tiga lea na onosaia e [Aperaamo] i aso pogisa o lena tofotofoga matautia, na faatagaina ina ‘ia ia malamalama ai mai i le mea na tupu ia te ia lava, e faatatau i le telē tele o le taulaga na faia e le Atua lē mafuatia mo le faaolataga o le tagata.” – *Patriarchs and Prophets*, p. 154.

b. Faamatala pe na faapefea ona silafia e Iesu, e pei lava ona iloa e Isaako, o Lona Tamā lea na ofoina atu o Ia e avea ma taulaga mo le lalolagi atoa. Kenese 22:10; Mataio 26:38, 39; Filipi 2:8.

“Na tuua e Iesu lona aiga i le lagi ma afio mai ai i lenei lalolagi pogisa e aapa mai i nofoaga sili ona loloto o le pagatia faaletagata, ina ia mafai ai ona Ia lavea’i ia i latou ua sauni e fano.” – *The Bible Echo*, January 1, 1893.

c. O le a le tiga silisili lava na puapuagatia ai Iesu i le taimi sili ona leaga o le faasatauroina o Ia? Salamo 69:18-21; Isaia 53:4, 10, 12.

“O le tiga faalemafaufau o le vavaeeseina o ia mai i le fiafia o lona Tamā, lea na matua tiga ai lava puapuaga o Keriso. . . . O lona tiga matautia, lea na mafua ona o le manatu faapea, o lea itula o lona manaoga, na lafoa’ia ai o ia e le Atua, o loo fa’aataina mai ai le tiga faalemafaufau o le a lagona e le tagata agasala pe a ia iloa ifo mulimuli, a ua tuai, ua aveesea le Agaga o le Atua mai ia te ia.” – *Mind, Character, and Personality*, vol. 2, pp. 464, 465.

Aso Lua

Fepuari 28

3. LAFOA’IA MO LE AGASALA

a. Aisea na lafoa’ia ai Keriso ae e le’i lafoa’ia Isaako? Kenese 22:12; Mataio 27:42, 43, 46; Ioane 3:17; 12:27; 2 Korinito 5:21.

“O agelu o le lagi na latou alolofa mutimutivale i lo latou Ta’ita’i ‘au pele. Na semanu latou te o ese mai i o latou tulaga ma o atu e fesoasoani ia te Ia. Peitai e lē o le fuafuaga lea a le Atua.” – *The Upward Look*, p. 223.

“Na tuuina atu e lo tatou Sui faalelagi i lona lava finagalo malie, lona agaga i le pelu o le faamasinoga tonu, ina ia tatou lē fano ai a ia tatou maua le ola e faavavau.” – *Selected Messages*, bk. 1, p. 322.

b. O le a le mea taua e faatatau i le faatali atu o auauna a Aperamo ae e na o le tamā ma lona atalii na o atu faatasi i le fata? Kenese 22:3-5, 8; Ioane 16:32.

“O le ofo tele na molimauina ai e agelu le tiga puapuagatia o le Faaola. O ‘au o le lagi na latou ufiufiina o latou foliga mai i lea vaaiga matautia. O le natura e lē ola na ia faailoa mai lona alofa i lona Atua foafoa ua faalumaina ma maliu. O le la na musu e vaai mai i le vaaiga matautia. O ona ave pupula atoatoa na faamalamalamaina ai le lalolagi i le aoauli, ae faafuasei loa ona foliga mai ua punitiaeseina. O le pogisa atoatoa lava, e pei o se ie uliuli o se pusa oti o se falelauasiga, na ufitia ai le satauro. . . .

“I lena pogisa mafafia na natia ai le faatasi mai o le Atua. . . . O le Tamā sa faatasi ma Lona Alo. A’o Lona mamalu i Lona faatasi mai e le’i faaaliaina. Ana faapea e susulu mai Lona mamalu mai i le ao, semanu ua faaumatiaina uma tagata ola uma e vaavaai atu i ai. Ma i lena itula matautia, e le’i faamafanafanaina ai Keriso i le faatasi mai o le Tamā.” – *The Desire of Ages*, pp. 753, 754.

c. E faapefea ona tatou iloa na lafoa’ia Keriso ae e le’i fano o Ia? Isaia 54:7, 8; Galuega 2:22-24, 27; 1 Korinito 15:55-57.

“O Iesu na tu’uina i totonu o le loa. Na ia afio atu i totonu o le pogisa o le tuugamau ma ia tofo ai i le oti mo tagata uma lava. Peitai e le’i umi ona i ai o Ia i lalo o le pule a le fili. O se agelu malosi na sau mai i le lagi ma tulei ese le ma’a mai i le gutu o le tuugamau. . . . O Keriso na ia afio mai nai le loa o Ia o se tagata manumalo ua manumalo ma na Ia ta’ita’iina mai nai o latou tuugamau se motu o tagata sa falepuipuiina ai.” – *The Signs of the Times*, November 25, 1889.

4. O SE FAAOLA UA TOE SOIFUA MAI

a. Faamatala pe na faapefea ona talitonu Aperaaamo i le mana o le toe tu mai. Kenese 22:5; Eperu 11:19.

“O lenei atalii [Isaako] na foa’iina mai i se auala e le’i mafaufauina; ma e le’i i ai ea ia te Ia o Lē na foa’iina mai le meaalofoa taua, se aiā Na te toe manaomia atu ai Lana lava meatotino na foa’i mai? Ona toe fa’aluaina lea e le faatuatua le folafolaga lea, ‘O le a valaauina lau fanau ia Isaako’ – o se fanau e lē mafaitaulia e pei o oneone i le matafaga (Kenese 21:12). O Isaako o se tamaitiiti lea o se vavega, ma e lē mafai ea e le mana na foa’iina ia te ia le ola, ona toe fa’afoisia mai le ola? O le vaavaai atu o Aperaaamo i tua atu o mea na vaaia e mata, na ia taofi mau atu ai i le fetalaiga lea a le Atua, ‘na manatu o ia e mafai e le Atua ona toe faatu mai o ia nai le oti’ (Eperu 11:19).” – *Patriarchs and Prophets*, p. 151.

b. Faamatala poo le a le uiga o le maliu ma le toe soifua mai o Keriso i le aiga tagata. Eperu 2:14, 15; 2 Timoteo 1:10; Roma 6:5.

“E lē mafai e Satani ona taofia ē ua oti i lana pule pe a fetalai atu le Alo o le Atua ia i latou ina ia latou ola mai. E lē mafai ona ia taofia i le oti faalēagaga le tagata e toatasi na te talia le upu o le mana, a Keriso, e ala i le faatuatua. O loo fetalai mai le Atua i tagata uma lava o loo feoti i le agasala, ‘Ala mai ia oe lena e te moe, ma ia ē ala mai nai le oti’ (Efeo 5:14). O le upu lena o le ola e faavavau lena.” – *The Desire of Ages*, p. 320.

c. O le a le taua o le manumalo o Keriso i le oti, i le tagata talitonu? 1 Korinito 15:12-19; 1 Peteru 1:3; Ioane 11:25, 26.

“O i latou na falepuipuiina ma na aveina a’e mai i tuugamau i le taimi o le toe soifua mai o Iesu, o Ana ipu ia o le manumalo i le avea o Ia ma Perenise manumalo. Na faapena ona Ia faamaonia mai Lona manumalo i le oti ma le tuugamau; na faapena ona Ia tuuina mai se ta’utinoga ma se folafolaga o le toe tu

mai o le au paia uma ua foeti.” – *The SDA Bible Commentary* [E. G. White Comments], vol. 5, p. 1109.

“E na o Ia lava . . . e mafaia . . . ona toe faatuina mai lana au paia mai i le tuugamau ma fa’aofuina i latou i le ola e faavavau, ma foai atu ia i latou le manumalo e faavavau i le oti ma le tuugamau, Na te mafaia i le taimi lenei ona tausia agaga o i latou uma lava e tuuina atu i Lana tausiga seia o’o atu i lena aso ma lavea’i ia i latou i lo latou lē malamalama.” – *Manuscript Releases*, vol. 21, p. 273.

Aso Tofi

Mati 2

5. O LE OLIOLIGA O LE FAAOLATAGA

a. O le a le lagona o Aperamo ina ua fa’aali atu e le Atua ia te ia Keriso o Ia o le Faaola e lavea’i mai i le agasala ma le oti? Ioane 8:56; Aisea e tatau ai ona avea kerisiano o ni tagata sili ona olioli i le lalolagi? Filipi 4:4; Galuega 2:25-27; 1 Tesalonia 5:16.

“A i ai Paulo i tulaga sili ona faavaivaia ai, lea na semanu e tuuina atu ai se a’afiaga e faavaivaia ai i luga o kerisiano fa’aafaafa, o [Paulo] e mausali lona loto, e tumu i le loto tele ma le faamoemoe ma le fiafia, ma ia alaga faapea, ‘Ia olioli i le Alii e lē aunoa, ou te toe fai atu, Ia olioli’ (Filipi 4:4). O le faamoemoe lava lea ma le fiafia o loo vaaia a’o i ai o ia i luga o le va’a, ma le matagi o loo agi solo mai ia te ia, ma le va’a ua malepe i tama’i vaega laiti. Ua ia tuu atu faatonuga i le kapeteni o le vaa ma faatumauina ola o i latou uma sa i ai i luga. E ui lava ina o ia o se pagota, ae o ia moni lava o le matai o le vaa, o le tagata sili ona saoloto ma sili ona fiafia i luga o le vaa.” – *My Life Today*, p. 334.

b. Aisea e avea ai o se vaega taua o lo tatou faatuatua le pese ma le vivii i le Alii? Salamo 98:1-6; 95:1-8; Faaaliga 15:2-4.

“A’o faimalaga atu tagata [o Israelu] i le vaomatua, e tele lesona taua na faatumauina i totonu o ō latou mafaufau e ala atu i pese. . . .

“Na faapena ona siitia a’e o latou manatunatuga mai i tofotofoga ma faigata o le ala, o le agaga atuatuvaale, fesoua’ina na faafilemuina ma faato’aina, o tapulaa o

le upu moni na totōina i le mafaufau, ma o le faatuatua na faamalosia.” – *Education*, p. 39.

“Ana faapea e sili atu ona tele viiga o le Atua e faia i le taimi lenei, semanu o le faamoemoe ma le loto tele ma le faatuatua o le a matua faatumauiina le faatupulaia.” – *Prophets and Kings*, p. 202.

Aso Faraile

Mati 3

FESILI TOE FAAMANATU

1. O a auala na avea ai Isaako o se faatusa o Keriso?
2. O faapefea ona faaalua e le olaga o Aperamo le loloto o le taulaga a le Atua?
3. Faamatala le mafuaaga na ala ai ona tataua ona uia e Keriso le lagona o le lafoa'ia o Ia.
4. O le a le uiga o le toe soifua mai o Keriso i le kerisiano?
5. O le a le fofō sili ona lelei mo le faanoanoa?

Lesona 10

Sapati, Mati 11, 2017

O le Onosai o Aperamo

“Inā faatali atu ia i ā Ieova, inā loto tele ia, ma o le a faamalosia e Ia lou loto: ou te fai atu, inā faatalitali ia i a Ieova” (Salamo 27:14).

“A tatou i ai i le lē malamalama, a’o tatou lē’i faailoaina atu ia te Ia o tatou popolega, o loo faia e le [Atua] fuafuaga mo lo tatou lavea’iga.” – *Our High Calling*, p. 316.

Faitauga Fautuaina: *Steps to Christ*, pp. 93-104;
Our High Calling, pp. 315-319.

Ulua’i Aso

Mati 5

1. O FAANAUNAUGA O LE LOTO

- a. **O le a le faanaunauga sa i le loto o Aperaaamo? Kenese 15:1-3. O le a le mea e folafola mai e le Atua ia i latou e talitonu ia te Ia? Salamo 37:4, 5; Mataio 21:21, 22.**
-

“O folafolaga uma lava i totonu o le Upu a le Atua, e mo i tatou. I a outou tatalo, ia outou faailoa atu le upu a Ieova ua ta’utinoina mai ma ia outou ole atu e ala i le faatuatua mo Ana folafolaga. O lana upu o le mautinoaga lea e iloa ai afai e te ole atu i le faatuatua, o le a ē mauaina faamanuiaga faaleagaga uma lava. Fa’aauau ona ole atu, ma o le a matua sili atu le taumasuasua o mea o le a ē maua e sili a’e nai lo mea na ē ole atu ai pe e te manatu foi i ai. A’oa’o e oe, oe lava ina ia talitonu faalagolago atoatoa i le Atua. Lafo atu ou popolega uma lava i luga ia te Ia. Faatali ma le onosai mo Ia, ma o le a Ia faataunuuina.” – *In Heavenly Places*, p. 71.

- b. **A tatou tatalo mo le Atua ina ‘ia Ia faataunuuina se manaoga o ō tatou loto, o le a se isi mea e tatau ona tatou tuufaatasia atu ai i taimi uma lava i o tatou manaoga? Iakopo 4:13-15; Mataio 26:39.**
-

“O le ala sa’o lava o le tuuina atu lea o ō tatou manaoga i lo tatou Tamā faalelagi e poto atoatoa, ma tuuina atu ma le talitonu faalagolago atoa lava mea uma ia te Ia i le talitonuga atoatoa lava. Ua tatou iloa e faafofoga mai le Atua ia i tatou pe afai tatou te ole atu e tusa ai ma Lona finagalo. Peitai, o le una’iina atu o ō tatou manaoga ia te Ia e aunoa ma se agaga gaua’i, e lē sa’o lea tulaga; o a tatou tatalo, e lē tatau ona tuuina atu i foliga o faatonuga, ae ia tuuina atu i foliga o aioiga ma olega.” – *The Ministry of Healing*, p. 230.

Aso Gafua

Mati 6

2. FAATALI I SE TAIMI SILI ATU ONA UMI NAI LO LE TAIMI NA MANATU I AI

- a. **Faamatala pe na faapefea ona tali mai e le Atua le tatalo a Aperaaamo i le taimi lava na uma ai ona ia tuuina atu lona manaoga? Kenese 15:3, 4.**
-

“Talu ai ona o Aperamo e le’i i ai sona atalii, na muamua ona ia manatu faapea o lana auauna faamoemoeina o Elisara, e tatau ona avea ma ona atalii fai, ma ona suli. Peitai ua faailoa atu e le Atua ia Aperamo faapea, o lana auauna o le a lē avea ma ona atalii ma ona suli, ae o le a ia maua moni lava se atalii.” – *Spiritual Gifts*, vol. 3, pp. 100, 101.

b. E ui lava ina folafola atu e le Atua ia Aperamo i le taimi lava lena se atalii, aisea na Ia lē ulua’i fa’aalia mai ai le aso o le a fanau mai ai le atalii o Aperamo? Galuega 1:6, 7; Faataoto 16:9; Salamo 34:8.

“Na finagalo le Alii Na te tofotofoina le faatuatua mausali ma le faalagolago atu o Aperamo i folafolaga na Ia fetalai atu ai ia te ia.” – Ibid., p. 101.

“Tatou te manaomia ina ia aua ne’i tatou manatu e susulu mai lava le la i lenei lalolagi. O ao ma afā o le a siomia mai ai i tatou, ma e tatau ona tatou sauni ina ia taula’i atu o tatou mata i le mea na tatou vaaia mulimuli ai le malamalama. O ona ave atonu o loo natia peitai o loo latou . . . susulu mai pea i tua atu o le ao. O la tatou galuega lo tatou faatali, ma mataala, ma tatalo, ma ia tatou talitonu. O le a sili atu ona maualuga lo tatou faatāuaina o le malamalama o le la pe a nimo ese atu ao. O le a tatou vaai i le faaolataga a le Atua pe afai tatou te talitonu faalagolago ia te Ia i totonu o le pogisa e faapena ai foi i totonu o le malamalama.” – *Our High Calling*, p. 318.

c. A lē taliina mai tatalo i le taimi tatou te manana’o e taliina mai ai, o le a le mea o loo lamatia ai i tatou? 1 Korinito 10:9, 10; Eperu 3:12-14. O fea o le a taula’i atu i ai? Kenese 16:1-6.

“A foliga mai ua lē taliina mai a tatou tatalo, e tatau ona tatou taofīmau atu i le folafolaga; auā o le a mautinoa lava le o’o mai o le taimi o le taliina mai, ma o le a tatou maua le faamanuiaga o loo sili ona tatou manaomia. Peitai o lo tatou fai mai faapea, o le tatalo o le a taliina mai i taimi uma lava i le auala tonu lava, ma le mea tonu lava o loo tatou manaomia, o le faataalise lea i le faaiuga e aunoa ma le taofi mau atu i folafolaga. E poto tele le Atua o lea e lē sese ai o Ia, ma e lelei tele o Ia o lea na te lē taofia ai soo se mea lelei mai ia i latou e savavali ma le faamaoni. Aua la e te fefe e talitonu ia te Ia, e ui lava ina ē lē vaai i le tali i le taimi lava e te

mana'omia ai, i au tatalo. Faalagolago i Lana folafolaga mautinoa, 'Ia outou ole atu, ona foa'iina mai ai lea ia te outou' (Mataio 7:7)." – *Steps to Christ*, p. 96.

Aso Lua

Mati 7

3. O LĒ E TAU IA MAI LE FAATUATUA

a. O a mea e lua e finagalo le Atua ia i tatou ia tatou talitonu i ai? Eperu 11:6. O le a le ulua'i faatinoga na faailoa mai e Aperamo? Kenese 15:4-6.

“E lē tatau ona tatou tuuina atu o tatou manaoga i le Atua ina ia tatou *tofotofo* ai pe o le a Ia faataunuuina Lana upu, ae tatou te tuuina atu o tatou manaoga i le Atua *ona* o le a Ia faataunuuina lana upu; e lē ina ia faamaonia ai e alofa o Ia ia i tatou, peitai ona e alofa o Ia ia i tatou.” – *The Desire of Ages*, p. 126.

b. E pei ona teena e le Atua Isamaeli mai i le avea o ia ma atalii o le folafolaga, faamatala pe na faapefea ona aafia le faatuatua o Aperamo ma Sara i le Atua i Lona faataunuuina o Lana folafolaga, ona o le taimi. Kenese 17:15-18; 18:9-12.

“Ina ua toeitiiti lava a selau tausaga o Aperamo, na toe fa’aluaina atu ai loa ia te ia le folafolaga e faatatau i se atalii, faatasi ai ma se mautinoaga faapea o le suli oi lumanai, o le tama lea a Sara. Peitai e le’i malamalama Aperamo i le taimi lena i le folafolaga. O lona mafaufau na liliu atu i le taimi lava lena ia Isamaeli, ma ia pipii atu i le talitonuga faapea o fuafuaga alofa a le Atua, o le a faataunuuina e ala atu ia te ia.” – *Patriarchs and Prophets*, p. 146.

c. O le a le mea e faapipii mai i tatalo uma lava e taliina mai? Kenese 18:14, 21:1, 2. O le a se mea e tatau ona tatou manatua i taimi uma lava e faatatau i le taimi e atofaina e le Atua i le faatusatusa atu i la tatou taimi? Hapakuka 2:3.

“O tatalo faamaoni uma lava o le a o’o mai i ai le tali. Atonu e lē o’o mai e faapei tonu lava ona ē faanaunau i ai, poo le taimi foi na ē faatalitali atu i ai; peitai o le a o’o mai i le auala ma le taimi o le a sili ona faamalieina ai lou manaoga. O

tatalo e te ofoina atu i le tuua to'atasi o oe, i lou vaivai, i tofotofoga, e tali mai e le Atua, e lē taliina mai i taimi uma e tusa ai ma ou mana'o, ae mo lou lelei i taimi uma lava.” – *Gospel Workers*, p. 258.

“E lē o taimi uma e tali mai ai e le Atua a tatou tatalo i le taimi muamua lava tatou te valaau atu ai ia te Ia; auā afai Na te faia lenei tulaga, atonu o le a tatou manatu e i ai sa tatou aiā i faamanuiaga uma lava ma mea lelei uma na Ia foai mai i luga ia i tatou. E aunoa ma lo tatou suesueina o ō tatou loto ina ia oi iloa ai poo i ai se agasala na manatunatu ma fiafia i ai i tatou, poo soo se agasala o loo tuinanau saoloto i ai, o le a tatou i ai i se uiga lē faaeteete lē faautauta ma tatou lē iloa ai lo tatou faalagolago atu ia te Ia, ma lo tatou manaomia o Lana fesoasoani.” – *The Review and Herald*, March 27, 1913.

Aso Lulu

Mati 8

4. O LE MANAOMIA O LE ONOSAI

a. Aisea e lē faatagaina ai i taimi uma e le Atua le faataunuuga o se tatalo i le taimi lava e faia ai? Iakopo 1:2-4; Roma 8:24, 25.

“Tatou te manana'o uma lava i tali tu'usa'o i le taimi lava tatou te tatalo atu ai, ma e faaosoosoina i tatou ina 'ia tatou fa'avaivai pe a faatuai mai le tali pe o'o mai foi i le foliga ma se tulaga tatou te lē'i mafaufauina. Peitai o le Atua e poto tele ma e lelei tele o Ia, o lea Na te lē taliina mai ai a tatou tatalo i taimi uma lava i le taimi tonu lava ma le tulaga tonu lava o loo tatou faanaunau i ai. O le a Ia faia mea e sili atu ona tele ma sili atu ona lelei mo i tatou nai lo le faataunuaina o ō tatou manaoga uma lava. Ma, talu ai la e mafai ona tatou talitonuina Lona poto ma Lona alofa, o lea e lē tatau ai ona tatou ole atu ia te Ia Na te gaua'i mai i o tatou manao, ae e tatau ona tatou saili ina ia tatou ulufale atu ma faataunuaina Lana fuafuaga. O ō tatou manaoga ma mea tatou te fiafia i ai, e tatau ona faagaloina, a ia faia Lona finagalo. O nei mea uma e tofotofoina ai le faatuatua, e mo lo tatou lelei. O mea ia e fa'aalia ai pe moni ma faamaoni lo tatou faatuatua, ma tatou faalagolago tasi atu i le upu a le Atua, pe e lē mautinoa foi lo tatou faatuatua ma feliuliua'i, e faalagolago i mea e tutupu. O le faatuatua e faamalosia e ala i le faatinoina.” – *The Ministry of Healing*, pp. 230, 231.

b. O le a le mautinoaga e mafai ona tatou maua i folafolaga a le Atua, e ui lava ina lē faataunuuina i taimi uma tatou te manatu e tatau ona faataunuuina ai? Eperu 6:13-18; Isaia 55:8-11; Salamo 27:14.

“Galue i le faatuatua, ma tuu atu iuga i le Atua. Tatalo i le faatuatua, ma o le a aumaia e le mea lilo o Lana taitaiga, lona tali. E i ai taimi atonu e foliga mai ai e lē mafai ona ē manumalo. Peitai, galue ma talitonu, ma tuu atu i au taumafaiga le faatuatua, faamoemoe, ma le loto tele. A uma ona ē faia le mea e mafai ona ē faia, faatali mo le Alii, ma faailoa atu Lona faamaoni, ma o le a Ia faataunuuina Lana upu. Faatali, e lē o le faatali i le popole lē onosai, a ia ē faatali i le faatuatua e lē o i ai se fefe ma le talitonu e lē maluelueina.” – *Testimonies*, vol. 7, p. 245.

“Faatali i le Alii, ou te toe fai atu, Faatali i le Alii. Atonu e mafai ona tatou ole atu i mea faigaluega faaletagata ma tatou lē maua. Ae e mafai ona tatou ole atu i le Atua ma Na te fetalai mai, O le a outou maua. O lea tou te iloa ai Lē tou te vaavaai atu i ai; tou te iloa ai Lē tou te talitonu faalagolago atu i ai. E lē tatau ona outou talitonu i le tagata pe tou te faia foi le tagata ma o outou malosi. Ia outou matua faalagolago atu lava i le Atua Malosi o Lē ua fetalai mai faapea, ‘Pe se’i tago o ia i Lo’u malosi, ia mā lelei ma ia, o le a lelei foi o ia ma A’u’ (Isaia 27:5). Ona ē faatali loa lea ma mataala ma tatalo ma galue, ma faatumau le liliu atu o ou foliga i le La o le Amiotonu.” – *Reflecting Christ*, p. 119.

Aso Tofi

Mati 9

5. O LE ONOSAI O LE AU PAIA

a. O le a le amio o loo faamatalaina mai ai tagata totoe o le Atua? Faaaliga 14:12. Aisea e lē o ta’ua mai ai le alofa, o le laasaga sili ona maua lea o le apefa’i a le kerisiano? 2 Peteru 1:5-7; Iakopo 5:7, 8.

“O le filifiliga mausali, o taumafaiga lē mafaavaivaia, lea o le a maua mulimuli ai lava le manumalo. O le tagata e onosai seia o’o i le iuga lea o le a lavea’iina. O i latou e fa’aauau pea lava i le amio lelei ia o le a maua le ola e faavavau ma le tau i o le olaga e faavavau. . . . O i latou uma lava o loo auai i lenei taua ma Satani ma ana ‘au, o loo ia i latou se galuega mae’ae’a lava i o latou luma. E lē tatau ona latou vaivai e faapei o se ga’o, lea e mafai ona faaliusuavaiina e le afi

i soo se ituaiga foliga. E tatau ona latou onosaia faigata e faapei o fitafita faamaoni, tutulai i o latou tulaga, ma ia faamaoni i taimi uma ta'itasi.” – *Testimonies*, vol. 2, pp. 101, 102.

b. Faamatala pe faapefea ona fa’aaoga e le Atua o tatou tofotofoga o le taimi lenei e saunia ai i tatou mo le toe afio mai o lo tatou Alii. Eperu 10:35-39; Mataio 25:5; 24:13, 42-44.

“I le olaga faaletapuaiga o tagata taitasi uma lava e manumalo mulimuli lava, o le a i ai vaaiga o le nunumi lē malamalama tele lava ma tofotofoga; peitai o lona iloa e faatatau i le Tusi Paia, o le a mafai ai e ia ona ia manatua folafolaga a le Atua e faalototeleina ai, ia o le a faamafanafanaina ai lona loto ma faamalosia ai lona faatuatua i le mana o Lē Silisiliese. . . . O le tofotofoga o le faatuatua e sili atu ona taua nai lo le auro. O tagata uma lava e tatau ona latou iloa o se vaega lenei o le koleniga i totonu o le a’oga a Keriso, lea e aoga e faamamāina ai ma faaleleia ai i latou mai i le otaota o le faalelalolagi.” – *God’s Amazing Grace*, p. 81.

Aso Faraile

Mati 10

FESILI TOE FAAMANATU

1. O le a foai mai ea e le Atua ia i tatou manaoga uma lava o ō tatou loto?
2. O le a le lagona e tatau ona i ai ia i tatou pe a lē taliina mai a tatou tatalo uma lava i le tulaga tatou te manatu i ai?
3. Aisea e mafai ai ona ave le “taimi” o se lu’i silisili lava i lo tatou faatuatua?
4. I totonu o se lalolagi o auala vave lava o fesootaiga, o le a le uiga tatou te manaomia ina ia tatou fausiaina a’e?
5. Aisea o le a pa’u’ū ese ai i latou e lē fausiaina a’e so latou talitonuga onosai i le Upu a le Atua?

Aioi mo Tagata Agasala

“Ia iloa e ia, o lē fa’afo’i mai le tagata agasala nai lona ala sese, o le a faaolaina e ia le agaga nai le oti, o le a ufiufi foi e ia le vao agasala” (Iakopo 5:20).

“O tane ma tama’itai finafinau, faasatauroina e i latou i latou lava, o loo manaomia, o ē o le a o atu i le Atua ma aioi atu ma le tagi tele ma loimata mo agaga o loo i le tausi’usi’uga o le faafanoga.” – *Gospel Workers*, p. 26.

Faitauga Fautuaina: *Patriarchs and Prophets*, pp. 156-170.

Ulua’i Aso

Mati 12

1. SOTOMA MA KOMORO

a. O le a le faasalaga na puapuagatia ai aai o Sotoma ma Komoro? Kenese 19:24, 25; Luka 17:29.

“Na fa’atoto fa’aia ifo e Ieova le teio ma le afi mai i le lagi i luga o aai, ma o le laueleele laugatasi lea na tumu i fua o le eleele; o ona maota fa’atupu ma malumalu, o fale taugata, o togalaau ma tovine, ma, o motu tumutumu o tagata valea faalialiavale sailiili fiafiaga ia sa na o se po lava na mavae atu na latou fa’aamuamu ai i avefeau a le lagi – na faaumatiaina i latou uma.” – *Patriarchs and Prophets*, p. 162.

b. O ai ua avea i ai Sotoma ma Komoro ma fa’aa’oa’o? 2 Peteru 2:6, Iuta 7.

“O le afi na susunuina ai aai o le laueleele mafolafola, na latou faasusuluina mai le malamalama o la latou lapataiga i lo tatou taimi. Ua a’oa’oina mai ia i tatou le lesona matautia ma le tāua e faapea, a’o umi ona onosai le alofa tunoa o le Atua i le tagata solitulafono, ae e i ai lava se mutaaga e lē mafai ona laasia e tagata i le

agasala. A ausia loa lena gataaga, ona aveesea mai loa lea o ofo a le alofa tunoa, ona amata loa lea o auunaga a le faasalaga. . . .

“O le iuga o Sotoma o se lapataiga matautia lava lea, e lē gata ia i latou o loo agasala i le agasala lē mataofia, ae e faapena ai foi ia i latou uma lava o loo ta’a’alo i le malamalama na auina mai i le lagi, ma avanoa sili ona taua.” – Ibid., pp. 162, 165.

Aso Gafua

Mati 13

2. O LE AIOIGA A APERAAMO

a. O fea sa nofo ai le atalii o le uso o Aperaaamo, o Lota? Kenese 13:10-13; 19:1.

“O Sotoma na sili ona matagofie i le lotolotoi o aai o Vanu o Ioritana, na taatia i se laueleele mafolafola lea sa ‘faapei o le faatoaga a le Alii’ i lona eleele e ola lelei ai faatoaga ma lona matagofie. O iinei na ola lauusi ai laau e tele o le eleele o le tau mafanafana.” – *Patriarchs and Prophets*, p. 156.

b. Ina ua faaali atu e le Alii ia Aperaaamo faapea o le a Ia faaumatiaina Sotoma ma Komoro, na faapefea ona aioi Aperaaamo i se tulaga lē tu’usa’o mo le aiga o Lota? Kenese 18:22-32.

“O le tagata o le faatuatua na ia aioi mo tagata o Sotoma. Na lavea’i muamua i latou e Aperaaamo i lana pelu, o lenei ua ia taumafai e lavea’i i latou e ala i le tatalo. . . .

“O le ava loloto tele ma le agamalu na ia auganiina atu ai ana olega . . . E le’i i ai se faalagolago ifo o ia ia te ia lava, leai ni upu loto vii e faatatau i lana lava amiotonu. Na te le’i manatu e i ai sana aiā i le fiafia mai o le Atua ia te ia ona o lona usitai, poo taulaga na ia faia i lona faia o le finagalo o le Atua. O ia lava o le tagata agasala, o lea na ia aioi ai mo le tagata agasala. O le ituaiga agaga lea e tatau ona maua e i latou uma lava e faalatalata atu i le Atua. Ae na faaalia atu e Aperaaamo le mautinoaga o se tamaitiiti o loo aioi atu i se tamā alofa. Na ia faalatalata atu lava i le avefeau faalelagi ma augani atu ma le finafinau lava lana aioiga. . . . Na manatu Aperaaamo faapea, i lena aai tumutumu, sa tatau ona i ai nisi

e tapua'i i le Atua moni. . . . E le'i faatasi ona aioi atu Aperaaamo, ae na fa'atele. Na atili toa lona loto a'o auganiina atu ona manaoga, na ia fa'aauau pea seia o'o ina ia maua le mautinoaga faapea, afai lava e maua ai ni tagata amiotonu se to'a sefulu, o le a lē faaumatiaina le aai.

“O le alofa mo agaga o loo fano na osofia ai le tatalo a Aperaaamo. A'o ia inoino i agasala a lena aai leaga lē faamaoni, ae na ia faanaunau ina ia lavea'iina tagata agasala. O lona naunau loloto mo Sotoma o loo faailoa mai ai le popolega e tatau ona tatou lagonaina mo le tagata lē salamo. E tatau ona tatou teufatuina le inoino i le agasala, ae ia tatou alolofa mo le tagata agasala. O ō tatou itu uma lava o loo i ai tagata o loo o ifo i le faafanoga e matua leai lava se faamoemoe, ma matua matautia lava le leaga, e faapei o le faasalaga na o'o mai i luga ia Sotoma. O aso taitasi uma e tapunia ai le alofa tunoa i nisi. O itula taitasi uma lava, e pasia atu ai e nisi le tuaoi e o'o atu i ai le alofa tunoa. Ma, o fea o i ai leo o lapataiga ma olega ina ia lapatai atu i le tagata agasala ina ia sola ese mai i lenei faafanoga matautia? O fea o i ai lima e aapa atu e toe toso mai ia te ia mai i le oti? O fea o i ai i latou o loo aioi ma le agamalu ma le faatuatua finafinau i le Atua mo ia?” – Ibid., pp. 139, 140.

Aso Lua

Mati 14

3. TATALO E TALIINA MAI

a. Faamatala pe na faapefea ona tali mai e le Atua le tatalo a Aperaaamo ina ia lavea'ia Lota. Kenese 19:1-3, 12-16, 27-29.

“O le lē malamalama tele ma le faanoanoa o [Lota], o lea na ia fa'atuai ai, ma lē mana'o ai e alu ese. Peitai, ana leai agelu a le Atua, semanu latou te fano uma i faafanoga o Sotoma. O avefeau faalelagi na latou fetagofi atu i lona lima, ma le lima o lana avā ma lima o ona afafine ma ta'ita'i ese i latou mai i le aai.” – *Patriarchs and Prophets*, p. 160.

b. O le a se mea tatou te manaomia i taimi uma lava ina ia tu'ufa'atasia ma a tatou tatalo ina ia tuu atu ai le malosi i a tatou tatalo? Eperu 11:6; Mataio 17:14-20; Mataio 9:29.

“Tatalo i le faatuatua. Ma ia mautinoa, ia aumaia o outou olaga ia loto gatasi ma a outou aioiga, ina ia outou maua ai faamanuiaga o loo outou tatalo ai. Aua ne’i faavaivaia lo outou faatuatua, auā o faamanuiaga e maua, e tutusa ma le faatuatua o loo faatinoina. ‘Ia faia ia te oe e tusa ai ma lou faatuatua.’ ‘O mea uma lava, soo se mea lava o le a tou ole atu ai i le tatalo, ma talitonu, o le a outou maua’ (Mataio 9:29; 21:22). Tatalo, talitonu, olioli. Pepese i viiga i le Atua ona ua Ia taliina mai a outou tatalo. Talitonu ia te Ia i le Upu tonu lava ua Ia fetalai mai ai. ‘E faamaoni o Ia o Lē ua folafola mai’ (Eperu 10:23). E leai lava se olega faamaoni e tasi e lē taliina mai.” – *Testimonies*, vol. 7, p. 274.

“E tatau ona tatou taofi mau atu i le lima sili atu ona mausali i folafolaga e lē mafai ona lē taunuu a le Atua. E tatau ona i ai ia i tatou le faatuatua lea o le a lē mafai ona teena mai, le faatuatua lea o le a taofi mau atu i mea e lē o vaaia, le faatuatua e mausali, e lē mafaagae’etiaina. O le faatuatua faapena o le a aumaia ai le faamanuiaga a le lagi i o tatou agaga.” – *My Life Today*, p. 8.

c. E faapefea ona mafai ona tatou maua le mautinoaga tatou te iloa ai o le a lavea’i e le Atua i taimi uma lava tagata amiotonu? 1 Peteru 3:12; Salamo 145:18, 19; 55:22.

“I itula sili ona pogisa, i lalo o mea e tutupu e sili ona leaga, e mafai ai e le kerisiano talitonu ona ia tausia lona agaga ia faatumauina i luga o le puna o malamalama uma ma le mana uma. O aso taitasi uma, e ala i le faatuatua i le Atua, e mafai ai ona faafouina lona faamoemoe ma lona loto tele. . . . O le a sili atu ona faataunuu e le Alii manaoga sili ona maua luga o i latou e tuu atu lo latou talitonuga ia te Ia. O le a Ia foai atu ia i latou le poto e manaomia e o latou manaoga eseese.” – *Ibid.*, p. 55.

Aso Lulu

Mati 15

4. AIOI MO TAGATA

a. O le a le tulaga o le a i ai le lalolagi i le taimi e soso’o tonu lava ma le toe fo’i mai o Iesu? Luka 17:28-30; 2 Timoteo 3:1-6.

“Na faailoaina mai ia te a’u le tulaga o le lalolagi, ua matuā faataalise lona fa’atumulia a’e o lana ipu o le amioleaga. O le sauā ma solitulafono eseese uma lava ua faatumulia ai lo tatou lalolagi, ma o Satani ua ia fa’aaogaina auala uma lava ina ia fa’alauiloa ma fa’ata’uta’ua ai solitulafono ma amioga leaga maulalo. O talavou o loo savavali i auala o loo siomia e tusi o solitulafono ma le agasala, o loo faailoa mai i ni tala lē moni poo loo faatinoina foi i se faletifaga. O ō latou mafaufau o loo a’oa’oina ia faamasani ma le agasala. O amioga o loo faia e tagata amio maulalo ma le leaga ua faatumauina atu i o latou luma i tusitusiga o le taimi nei, ma o mea uma lava e mafai ona faaosofia ai le fia iloa fia su’esu’e ma faaosofia a’e ai tuinanauga faamanu, ua aumaia i o latou luma i tala faaoso lagona.

“O tusitusiga o loo sau mai i mafaufau faaleagaina lē faamaoni, e fa’a’onaina ai mafaufau o le afe ma afe i totonu o lo tatou lalolagi. O le agasala ua lē foliga mai e matuā agasala lava. Latou te faalogo ma faitau i le tele o soligatulafono ma amioleaga, o lea, o le mafaufau lea sa mu’amu’a muamua, lea sa ono sola ese i le mata’u tele, ua matuā matatupa lava o lea ua mafai ai ona ia manatunatu ma le naunau faapito matape’ape’a i tautalatalaga ma gaioiga maulalo ma le leaga a tagata.” – *Testimonies*, vol. 3, pp. 471, 472.

“O le motu e to’atele o tagata o loo finafinau ina ia latou faagaloina le Atua, ma latou te talia ma le naunau tala faatupu, ina ia mafai ai ona latou savavali i le ala o le faamalieina saoloto e le tagata o ona tuinanau e aunoa ma le faalavelaveina.” – *The SDA Bible Commentary* [E. G. White Comments], vol. 5, p. 1122.

b. Faamatala pe faapefea ona mafai ona tatou maua le uiga lava lea e tasi o le tatalo lea sa ia Aperamo. Esekielu 9:4; Iakopo 5:16-20.

“E lē tatau ona tatou faasalaina isi; e lē o sa tatou galuega lenei; ae e tatau ona tatou alofa le tasi i le isi ma tatalo le tasi mo le isi. A tatou iloa se tasi ua sese mai i le upu moni, e mafai loa ona tatou fetagisi mo ia e faapei ona tagi Keriso mo Ierusalem.” – *Testimonies*, vol. 5, pp. 345, 346.

“A sē se uso, o le taimi lena e te faailoa ai lou naunau moni ia te ia. Alu ma le agalelei ia te ia, tatalo faatasi ma ia ma tatalo mo ia, ma ia ē manatua le tau lē mafuatia na totogiina e Keriso e faatauina mai ai o ia. O le auala lenei e mafai ai ona ē lavea’ia se agaga mai i le oti ma ē natia ai le tele o agasala.” – *Ibid.*, pp. 58, 59.

“O le vasega o tagata ia latou te lē lagonaina lo latou tiga i lo latou lava olaga pa’ū faaleagaga, pe fetagisi foi ona o agasala a isi, o le a tuua i latou e aunoa ma le faamaufaailoga a le Atua.” – Ibid., p. 211.

Aso Tofi

Mati 16

5. O LE FAASALAGA O LOO FAAMALUMALU MAI

a. O le a le mea e tatau ona tatou fesoasoani i tagata ina ia latou sosola ese mai ai? Faaaliga 14:7, 10, 11; 15:1.

“O tagata amioleaga o le a latou lē tetee i se foliga o le amioatua, o le a latou lē teena foi se auaunaga ta’uta’ua lea e lē o faailoaina mai ai se satauro mo i latou e tauaveina. O le loto faalenatura o le a ia lē siitiaina a’e se tetee maumaututū i se tapuaiga e lē o i ai ma se mea e tasi e faagateteina ai le tagata o loo soli i le tulafono, poo se mea foi e aumaia e tauave ai e le loto ma le malamalamaaga o le mafaufau mea moni matautia o se faasalaga o le a o’o mai. O le fa’aaliga a le Agaga ma le mana o le Atua lea e faatula’iina mai ai itu tetee, ma ta’ita’ia ai le loto faalenatura ina ia fouvale. O le upu moni lea e lavea’iina ai le agaga e lē gata ina tatau ona sau mai i le Atua, ae peitai e tatau foi ona faatasi Lona Agaga i lona faailoaina atu i isi, a leai, e pa’ū e aunoa ma se malosi i luma o aafiaga e tetee mai.” – *Gospel Workers* (1892), p. 66.

b. E faapei o le mea na tupu ia Lota, e faapefea ona tatou iloa e to’atele o le a toeitiiti lava a lē sao ese mai i faasalaga o le a o’o mai? Kenese 19:17; Luka 17:28-32; 1 Peteru 4:17, 18.

“O faasalaga a le Atua e lē o toe umi ae liligi mai loa i luga o le fogaeleele. ‘Inā sola ia e te ola ai’ o le lapataiga lea mai i agelu a le Atua (Kenese 19:17). O isi leo o loo faalogoina o loo fai mai: ‘Aua tou te soona vevesi vale; e lē o i ai se mafuaaga mo lapataiga faapitoa.’ O i latou o loo faafifilemu i totonu o Siona latou te alalaga faapea ‘E Filemu ma e saogalemu,’ ae o loo faailoa mai e le lagi faapea, o faasalaga faataalise o le a o’o mai i luga o le tagata solitulafono. . . . Na faapena le tulaga sa i ai i le faaumatiaga o le lalolagi tuai ma le taimi foi na faaumatiaina ai Sotoma ma Komoro e le afi.” – *Testimonies*, vol. 5, p. 233.

FESILI TOE FAAMANATU

1. O a lapataiga ua tuuina mai ia i tatou i le mea na tupu ia Sotoma?
2. O le a le avega e tataua ona i ai i kerisiano uma?
3. Faamatala pe faapefea ona lavea'iina se tagata e le tatalo o le faatuatua.
4. O le a le uiga tatou te manaomia i le taimi lenei e sili atu nai lo se isi lava taimi na tatou manaomia ai?
5. Faamatala pe aisea e manaomia ai ina ia tuuina atu le lapataiga mulimuli i se tulaga finafinau lava ma le iloaina o le pu'upu'u tele o le taimi.

Lesona 12

Sapati, Mati 25, 2017

O le Tofi o Aperamo

“Auā na faatalitali atu [Aperamo] mo se aai sa i ai ona fa’avae, o lona tufuga o le Atua lea” (Eperu 11:10).

“Ua na o i tatou lava o ni tagata faimalaga ma ni tagata ese i lenei lalolagi. O loo tatou sailia se aai lea sa vaavaai atu i ai Aperamo, o Lē na fausia ma faia, o le Atua lea.” – *In Heavenly Places*, p. 112.

Faitauga Fautuaina: *Testimonies*, vol. 1, pp. 346-353;
The Faith I Live By, p. 304.

Ulua’i Aso

Mati 19

1. O SE FOLAFOLAGA O LE TOFI

- a. **O le a le tofi na folafola e le Atua ia Aperamo ma lona atalii? Kenese 17:7, 8; 1 Nofoaiga Tupu 16:15-18; Roma 4:13.**

“O le meaalofoa ia Aperamo ma lona atalii e lē na o le eleele o Kanana na aofia ai, peitai o le lalolagi atoa lava. . . . Ma o loo a’oa’o manino mai e le Tusi Paia faapea, o folafolaga na faia atu ia Aperamo, o le a faataunuuina e ala mai ia Keriso.” – *Patriarchs and Prophets*, p. 170.

b. O le a le mea lea na faatusalia mai e le eleele folafolaina faalelalolagi, o Kanana? Eperu 11:8-10, 13-16; Faaaliga 21:1-3.

“O le siufofoga o le Atua na faalogoina, o faatonu atu ia Aperamo ina ia aua ne’i ia manatu e vave ona fai mo ia le Laualeele Folafolaina, ma na faasino atu i luma i puapuaga o lana fanau i tupulaga oi luma a’o le’i faamausaliina i latou i Kanana. O le fuafuaga o le faaolataga na tatalaina atu ia te ia iinei, i le maliu o Keriso, le taulaga silisili, ma Lona afio mai i le mamalu. Na vaaia foi e Aperamo le lalolagi ua toe faafoisia i lona matagofie e pei ona ulua’i i ai i Etena, lea o le a foa’iina atu ia te ia e fai mona tofi e faavavau, o le faataunuuga mulimuli atoatoa lea o le folafolaga.” – *Ibid.*, p. 137.

Aso Gafua

Mati 20

2. SULI O LE MALO

a. O ai le suli moni e toatasi o le malo o le folafolaga? Mataio 21:33-39; Kalatia 3:16; Eperu 1:1, 2.

“O Keriso o le suli filifilia lea o le Tamā i mea uma, o ia foi na Ia faia a’i lalolagi.’ O ia o le ‘pupula o Lona mamalu, ma o le faatusa lea e matuā tusa lava ma Ia.’ Na ia faatumauiina foi i luga ‘mea uma lava e le upu o Lona mana’ (Eperu 1:2, 3). Sa ia te ia le atoatoaga faaleatua ma le mamalu silisiliese. Na finagalo malie le Tamā ina ia afio i totonu ia te ia le tumu atoatoa. Ma o Keriso ‘e le’i manatu o ia o se mea faoa le tutusa o ia ma le Atua’ (Filipi 2:6). Ae na faafesuia’ia e Iesu se nofoalii o le malamalama ma le mamalu lea sa ia te ia ma le Tamā, ma ia manatu ai e lē o se mea e mana’ona’o i ai, le tutusa o ia ma le Atua, a’o leiloa le tagata i le agasala ma le malaia. Na ia afio mai le lagi i le lalolagi, ma fa’aofuina lona itu atua i le tino tagata, ma ia tauaveina ai le malaia i le avea ai o ia o se faaola mautinoa mo

le aiga tagata pa'ū. E le'i faamalosia o ia na te faia lenei tulaga; peitai na Ia filifili ina 'ia ia tauaveina iuga o le solitulafono a le tagata ina ia mafai ai ona sao ese mai le tagata mai i le oti e faavavau." – *The Signs of the Times*, February 20, 1893.

b. E faapefea ona mafai ona avea i tatou ma suli faatasi ma Keriso i lo tatou tofusia i lona tofi? Roma 4:13-17; Kalatia 3:26-29.

"E na o i latou lava ua latou faatāuaina le alofa tunoa o Keriso, lea ua faia ai i latou ma suli o le Atua ma suli faatasi ma Iesu, o le a latou tulai mai i le tuugamau ua latou foliga mai i le faatusa o lo latou Faaola." – *Selected Messages*, bk. 1, p. 259.

"O le faataunuuga o le folafolaga faapea o le a avea i tatou ma suli faatasi ma Keriso, e faalagolago i lo tatou naunau e faafitia e i tatou i tatou lava." – *The Upward Look*, p. 235.

c. A'o tatou faailoa atu lo tatou faatuatua ia Iesu Keriso o lē o loo ala mai ai le faia mai o folafolaga a le Atua, o le a se igoa ua Ia faaigoaina ai i tatou? Roma 8:14-17; Kalatia 4:4-7.

"O oa o le olaga e faavavau ua tuuina atu i le tausiga a Iesu Keriso, Na te foa'iina mai i soo se tagata na te finagalo i ai; ae e matua faanoanoa lava, e matuā to'atele lava tagata e vave ona leiloa ese mai i la latou vaai le alofa tunoa tāua ua ofoina mai ia i latou e ala i le faatuatua ia te Ia. O le a ia foa'i mai oa faalelagi ia i latou o le a talitonu ia te Ia, ma vaavaai atu ia te Ia, ma tumau i totonu ia te Ia." – *Selected Messages*, bk. 1, p. 138.

Aso Lua

Mati 21

3. O SE MALO E FAAVAVAU

a. I le avea o i tatou ma atalii ma afafine o le Atua, e ala i le faatuatua, o le a le ituaiga malo ua folafolaina mai ia i tatou? Tanielu 2:44; 7:27; 2 Peteru 1:11.

“O fuafuaga a le Alii mo Ona tagata e tutusa lava i taimi uma. Na te finagalo e foai mai i fanau a tagata oa o se tofi e faavavau. O Lona malo o se malo lea e faavavau. A lavea’iina mulimuli loa i totonu o le malo o le mamalu i latou e filifili ia avea i latou ma fanau usiusitai a Lē Silisiliese, o le a faataunuuina ai loa le fuafuaga a le Atua mo le aiga tagata.” – *The Review and Herald*, December 26, 1907.

b. O le a le umi o le a olioli ai tagata talitonu i lenei malo e faavavau? Tito 3:7; 1 Ioane 5:11-13.

“O le olaga lenei, o se a’oga lea o le koleniga, lea e tataua ona liua ai i tatou, faaleleia, ma saunia mo le faatasiga ma le au paia i le malo o le Atua, le au paia ia tatou te manatu tatou te mafuta faatasi i tausaga atoa o le olaga e faavavau.” – *The Bible Echo*, July 29, 1895.

c. E faapefea ona tatou iloa e finagalo le Atua i tagata uma ina ia tofusia i lenei tofi? 2 Peteru 3:9; Esekielu 18:32; Ioane 3:16.

“E lē finagalo le Alii ina ia fano se tasi. O ona alofa tunoa e lē mafaitaulia, ma o le a Ia lē tuua lona tofi na Ia faatauina, lea na Ia foa’iina mai ai Lona lava soifua e toe faatauina atu ai, ina ia avea ma mea fiafia o faaososoga a Satani. O le lagi atoa lava ua foa’iina mai ia i latou uma lava e talitonu ia Iesu Keriso e avea ma o latou Faaola o taimi uma.” – *The Upward Look*, p. 150.

“O le Malamalama o le lalolagi o loo susulu mai i o tatou luga ina ia mafai ai ona tatou talia ave faalelagi ma faasusulu atu lenei malamalama i luga o isi i galuega lelei ina ia ta’ita’ia ai le tele o agaga ia latou viia lo tatou Tamā oi le lagi. E umi ona puapuagatia o Ia, e lē finagalo o Ia ina ia fano se tasi, a ia o’o uma tagata i le salamō, ma e tiga le finagalo o Iesu ona o le to’atele o tagata o loo teena ofo a Lona alofa tunoa ma Lona alofa lē mafa’atusalia.” – *Manuscript Releases*, vol. 2, pp. 237, 238.

Aso Lulu

Mati 22

4. TAOFIMAUINA O LO TATOU MAUTINOAGA

a. O le a le mea ua lapataia i tatou ina ia tatou taofi mau atu i ai? Eperu 3:14; 10:23, 35, 36; Faaaliga 3:11.

“O filifiliga e faia i se sekone, atonu e mafai ona faamausaliina ai e faavavau le tulaga o le tagata. . . . Peitai ia manatua, o le a manaomia le galuega a se olaga atoa ina ia toe faafo’isia mai ai le mea e lafoa’ieseina e se sekone e tasi o le gaua’i atu i faaosoosoga ma le lē manatunatu lelei. . . .

“O i latou o le a mauaina le lagi o le a latou tuuina atu a latou taumafaiga sili ona lelei ma o le a latou galulue ma le onosa’i puapuagatia umi lava, ina ia mafai ai ona latou seleseleina ai le fua o le galue tiga. O lo o i ai se lima o le a matuā tatala matalaina mai pa o Parataiso ia i latou ua manumalo i le tofotofoga o faaosoosoga ma ua latou tausia se malamalamaaga lelei e ala i lo latou lafoa’ia o le lalolagi, o ona mamalu, o ona viiga, mo le alofa ia Keriso, ma faapena ona latou ta’utinoina atu ai o Ia i luma o tagata ma latou faatali ai ma le onosai atoa lava mo Ia na te ta’utinoina mai i latou i luma o le Tamā ma agelu paia.” – *My Life Today*, p. 322.

b. Faamatala pe o le a faapefea ona lē maua se tofi e le to’atele o fanau a Aperamo i le tino. Numera 13:25-33; 14:1; Eperu 3:18, 19; Iuta 5.

“E fa sefulu tausaga na taofia ai e le lē talitonu, muimui, ma le fouvale, Israelu anamua mai i le eleele o Kanana. O agasala lava ia e tasi ua fa’atuaiina ai le ulufale atu o Israelu o le taimi lenei i le Kanana faalelagi. E leai ma se sese o folafolaga a le Atua i nei vaega e lua. O le lē talitonu, o le faalelalolagi, o le lē faamaoni lē tuuina atu atoa i le Atua, ma finauga i le lotolotoi o tagata o loo fai mai o i latou o tagata o le Atua, lea ua taofia ai i tatou i lenei lalolagi o le agasala ma le faanoanoa i le tele o tausaga.” – *Evangelism*, p. 696.

c. O le a le mea e tasi e tataua ona fa’asilisilia i o tatou olaga? Mataio 6:33; Luka 12:31-34; Kolose 3:1, 2.

“Vaai ese mai i lenei lalolagi ma vaai atu i le lalolagi faavavau. Ia tuu atu au taumafaiga sili ona finafinau ina ia maua mai ai mea nā e faatāuaina e le Atua, ma na foa’iina mai ai e Keriso lona soifua tāua ina ia ē faamausaliina. O lona maliu ua matuā tatalaina mai ai ia te oe faitotoa o fefaataua’iga faalelagi. Teu au oa i autafa o

le nofoalii o le Atua, e ala i lou faia i lou tamaoaiga ua ia foai atu ia te oe, o le galuega lea na te finagalo ina ia faia i le manumaloina mai o agaga i se iloa e faatatau i le upu moni.” – *Counsels on Stewardship*, pp. 225, 226.

Aso Tofi

Mati 23

5. O LE MALO TUUFAATASIA E TASI A LE ATUA

a. E to’a fia i latou o le fanau a Aperamo o le a faatasi ma ia, ma vivii i le Atua a’o ia ulufale atu i totonu o lona tofi? Eperu 11:39, 40; 1 Tesalonia 4:16, 17; Isaia 66:23.

“E lē tatau ona tatou faanoanoa pe a tatou vaaia isi o tauivi i mea e fa’avaivaia ai e pei o i tatou foi, ma pa’u’ū atu i faaosoosoga e pei lava ona o’o ia i tatou, ma ua latou toe fo’i mai ma ua faamanuiaina e le Atua. O upu tusia e ala mai i le Agaga Paia e faamafanafana ma faafiafiaina ai le tagata sese. E ui lava ina o’o foi le au pateriaka ma aposetolo i vaivaiga faaletagata, ae e ala atu i le faatuatua na latou maua ai se ripoti lelei, na latou tauina a latou tauiviga i le malosi o le Alii, ma latou manumalo ai i le tulaga mamalu. E faapena ona mafai ona tatou talitonu i le amiotonu a le taulaga e togiolaina a’i, ma avea ai i tatou ma tagata manumalo i le suaafa o Iesu.” – *Testimonies*, vol. 4, p. 15.

b. O le a le mea o le a faia e tagata talitonu uma lava o le a lavea’iina pe a latou vaai faafesaga’i atu ia Iesu Keriso i le avea o ia ma o latou Faaola? Filipi 2:9-11; Faaaliga 7:9, 10. O le a le mea o le a faia e Iesu i le taimi lena? 1 Korinito 15:24-28.

“O le [au faaolaina] ua au faatasi i viiga o le [Tama’i Mamoe] o lē na maluu ina ia maua ai e tagata le ola e tutusa ma le ola o le Atua. O le finauga ua muta. O puapuaga ma feteena’iga ua i’u. O pese o le manumalo ua faatumulia ai le lagi uma a’o pepese a’e le au faaolaina i le pese, E tatau, e tatau le Tama’i Mamoe na fasia, ma ua toe soifua mai, o se toa manumalo.” – *The Acts of the Apostles*, p. 602.

FESILI TOE FAAMANATU

1. O le a le ituaiga laueleele na vaavaai atu i ai Aperaaamo?
2. O le a le auala e tasi e mafai ai ona tatou tofusia i le tofi o Aperaaamo?
3. O le a le faanaunauga o le Atua mo tagata uma i totonu o lenei lalolagi?
4. E faapefea ona mafai ona tatou taofi mau i lo tatou mautinoaga, lo tatou faatuatua ia mausali e o'o i le iuga?
5. O a ituaiga pese o le a usuina faatasi e le au faaolaina i le aufaipese a le lagi?